

पुर्खा दय्क तकगु सम्पत्ति, भीगु कला व संस्कृति
पिकाक-भक्तपुर नगरपालिका



पुर्खा दय्क तकगु सम्पत्ति, भीगु कला व संस्कृति

स्वयं

नेपाल संवत् १९४३ सिंला थ्व/२०७९ फागुन १/२०२३ Feb./ ल्या: ७७, दौं: ५

पुर्खलि सिर्जेको सतपति, हाको कला र संस्कृति

भक्तपुर नगरपालिका

तेह्रौं नगरसभा

“उद्घाटन समारोह”

भक्तपुर नगरपालिका

२०७९ माघ २३ गते सोमबार



**बुधप नगरपालिकाया
 हिं शकवु नगर सभा उलेज्या**

ख्वप जिल्लाया प्र.जि.अ. खगेन्द्र प्रसाद रिजालता लसकुस
यासे नगर प्रमुख (२०७९ माघ २२ गते)



मेयर कप तेक्वाण्डो कासाय् ख्वप नगरपालिका ल्यू या ल्यू
(२०७९ माघ १४ गते)



; Dkfb slo

@)&(kmfug !, c^a\$!)#, j if%

प्रतिनिधि सभाथें हे च्वंगु नगर सभा

ख्वप नगरपालिकाया हिंस्वकगु नगरसभा न्ह्याडः च्वंगु दः । नेपाल मजदुर किसान पार्टीया नायो भाजु नारायण मान बिजुक्छें (रोहित) जुं उलेज्या याडः द्यूगु उगु नगर सभा नेन्हू प्यन्हू ताः हाइगु खानय् दः नि ।

नगर सभा नगरपालिकाया दकलय् च्वयया सर्वोच्च निकाय खः । नगरसभां संविधान व स्थानीय सरकार सञ्चालन ऐन २०७४ रं ब्यूगु अधिकार छ्यलः मः काथंया ऐन, नियम, विनियम व कार्यविधित दय्की । नगर सभा नगर व्यवस्थापिका खः । न्हापांगु कार्यकालसं डादाया दुनय ख्वप नगरपालिकां पी च्यागू ऐन, नियम, विनियम व कार्यविधि दय्कला । चालु नगरसभाय् नं थी थी कार्यविधित देछायो द्यूगु गुगुं पारित जुलसा गुगुं छलफल जुयो च्वंगु दः । धाथें थव हिउँदे नगरसभाता विधेयक सभाकाथं नं काई । कानुनय् दाच्छिया नेक नगरसभा च्वनय् मःगु ब्यवस्था दः ।

प्रतिनिधिसभा व प्रदेश सभा थें हे न्ह्याकिगु खः सां ख्वप नगरपालिकाया सभा न्ह्याकिगु लू (दृश्य) भातिचा पा । सभासं सकल दुजः पुं अनुशासित व ब्यवस्थित काथं च्वनय्गु याई । सभा च्वडः च्वंगु इलय् पिनय् वानय् मःसा लाहा थाडः सभाया नायोया अनुमति कायो जक वानय् दैगु, सभाया दुनय थ वं थवय खाँ ल्हाय्गु, पत्रिका वनय्गु थजगु ज्या याय् मरुगु, तःतः सरं न्ह्यलय्गु व सभाता काथं मछिनिगु छुं नं ज्यायाय् मरुगु आचारसंहिता कडाइयाडः लागु याडः तःगु दः ।

प्रतिनिधि सभा व प्रदेशसभाखय् थें स्थानीय पालिकाय् विपक्षया ब्यवस्था मरु । ख्वप नगरपालिकाया नगर सभाखय् दुजः पिसं कार्यपालिकाया दुजः पिसं बाहेकं स्थानीय समस्या राष्ट्रिय व अन्तर्राष्ट्रिय घटना विषयसं थः ता लगय् जूगु विषय नुवाय् दः । सभासदपिन्ता नुवाय्गु प्रजातान्त्रिक अधिकार बियो तःगु दः । विशेष समय कायो नुवाय्ता सभासदपिन्ता ५ मिनेटया ई बिई । चालु नगरसभाय् नुवाइपुं सभासदपिसं देशय देसी सः कारखाना तय्केमःगु, नगरभरी त्वनय्गु नाः या समस्या ज्यंकय्गु, औद्योगिक क्षेत्र ल्हय्ता बः बियमःगु, संघ व प्रदेशं याडः च्वंगु ज्यात स्वः वानय् मःगु, थजगु विषयत न्हि थांगु जुल ।

अथेहे हकनं शिशु स्याहार केन्द्र ताडः चाय्के मःगु, पर्यटक पिनिपाखं चुहावत जुयो च्वंगुलिं नाका नाकाय् सिसिक्यामरा तय मःगु देको-मिवा, इटापाके आवास योजना मथां क्वचाय्के मःगु, पार्किङया बांलागु ब्यवस्था याय मःगु थजगु विषय सं कार्यपालिकाया दुजः पिनिगु ध्यानाकर्षण याडः दिल ।

सभा सं न्यंगु न्ह्यसः या लिसः स्वापु दःगु समितिया कजि पिसं वियगु ब्यवस्था नं दः । गुकिं समितिया कजिपिन्ता जिम्मेवार नं याई ।

निश्चित इलय थःगु धापु तय धुंकेगु, थःगु न्वचु च्वयो बिय मःगु, शिष्टतापूर्वक पालं पः न्वचु तैगु प्रचलन तस्कं स्वय हायँपुगु खानय् दः । सभाया सुरु निसें दकलय् लिपाथ्यंक स्वयबलय् नगर सभां प्रतिनिधि सभा व प्रदेश सभा हे खः ला धाय्थें च्वं । ख्वप दे शिक्षा, स्वास्थ्य, सम्पदा ल्यंकः म्वाकः तय्गु सुचुकुचु थजगु विषयखय् ब्यस्यलाक हज्याडः च्वंगु काथं काय्फः । देया प्रतिनिधि सभा व प्रदेशसभात नं ख्वप नगरपालिकाया नगरसभा थें अनुशासित, ब्यवस्थित व मर्यादित ढंगं न्ह्याकय् फःसा माननीय जू पिनिगु सम्मान व इज्जत च्वजाइगु खाँ धायो च्वनय् मालि थें मच्चं ।

पिकाक-ख्वप नगरपालिका/सम्पादक-आशाकुमार चिकं बञ्जार, डेस्कटप-धन लक्ष्मी त्यात, आवरण सज्जा-रेणु ध्वजु, थाकू- भक्तपुर अफसेट प्रिन्टर्स फोन ल्याः ०१-६६९३०४३, ई-मेल- khwopapau@gmail.com

सय वर्षपछिको भक्तपुर

‘नाचगानया राजधानी स्वप’ दे या छत्व र्खाँ

- नारायणमान बिजुवर्छे (रोहित)



‘नाचगानको राजधानी : भक्तपुर’ साफूति च्वमि जगदिश शमशेर राणां ख्वपदेया पुलांगु परम्परागत प्याखंता ल्यंकः म्वाकः, भिंकः तयता आग्रह इनाप, माग यासे ध्वाय्गु ज्या यागु तस्कं डाल काय बहःजु ।

साफूया धमा (भूमिका) सं च्वमिं ख्वप देता वास्तुकला, मूर्तिकला, काष्ठ-कलाया ज्वः मरुगु (अद्वितीय) संग्रह धायो दिसे म्हवय्खा इयो, पंखा इयो, सलौं इयो, बखुं इयो, तिका इयो या बारे न्हिथाडः तःगुदः । अलय उँट इयोया बारे वयकलं गनां न्हि थांगु मरु । सायद थुकिया खाँ वयकं मसिला नं जुयफः । दाजु किजाया अंशवण्डा याबलय् ल्वापु जुयो इयो बापा क्यूसेलिं अः वयो इयो मदय् धुंकल ।

प्याखं छगू तः हांगु शारीरिक ब्यायाम नं खः अलय संगीत दुनुगःया (हृदयया) छगू लयबद्ध नुग खाँ (अभिव्यक्ति)

नं खः । च्वमिं स्वनिगःता, ‘हलिमय्या दकलय तहांगु संगीतमय रंगशाला’ जक धायो नां तयो द्यूगु दः । व छाय् धःसा ‘थी थी जाति - उपजाति तयसं तिथि, पर्व, पूजा-आजा वापिज्या, वालयज्या, बुरां ज्या, भौमचा बियो छवैबलय, इहिपाया इलय, देउडा, जुहारी प्याखं म्येँ न्ह्याब्लेँ अथे धाय्गु न्हिं न्हिं धायथे वा दाच्छी तकंतु हालं च्वनि, क्यडः च्वनि ।’ ‘येँ दे राजनैतिक राजधानी खः सा ख्वप दे नाचगानया राजधानी खः ।’ धःगु खायँ च्वमिं धायो दी-खुश्व नौ बाजा दाफा, ६३ श्व म्येँ हालिगु दाफा, ३६गू ढलक दाफा, हिस्वथ्व भजन मण्डल, छथ्व क्वाखीं बाजा पुचः, २३ श्व धिमे बाजा खलः, स्वथ्व धौं बाजा पुचः, गुश्व नायखिं बाजा पुचः, गुश्व (जुगी माहालीं) कुस्ले बाजा पुचः, नेश्व कँ बाजा पुचः, स्वथ्व साय्मि तय्गु गुलाँबाजा, स्वथ्व (बजाचार्य/शाक्य) गुलाँ बाजा पुचः, डाथ्व गाई तय्गु पुचः, नपां स्वीश्व थी थी प्याखंया पुचः त, व छथ्व नवदुर्गा प्याखं अजनं दः नि ।’ च्वमि थुगु तथ्य जर्मन विद्वान गेट भेकनरया सर्वेक्षण पाखं कायो द्यूगु खः । १७ वडाय् ४० द्व जनसंख्यासं मुक्कं नेसगू म्येँ हालिपुं प्याखं हुइपुं दः धाय्गु खाँ न्हिथांगु वहे सर्वेक्षणया लिधंसाय् जुयो च्वना । च्वमिया धापु काथं मल्ल जुजुपुं ललितकलाखय् अपलं ध्यान तयो प्रेम याइपुं खः उकि प्रजाया तः हांगु योगदान दः । ‘गजम्हा जुजु अजपुं हे प्रजा (यथा राजा तथा प्रजा) धाय्गु श्व हे खः।

ख्वपदेया दकलय् लिपाया नेवः जुजु रणजित मल्लं थःत्वाय् काय पृथ्वी नारायण शाहता नपालः वां बलय् भैल प्याखंया छत्वः चा कोसेली काथं यंकगु जुयो च्वना । ‘उगु प्याखं पोखराय् अःनं ल्यं दः नि ।’ ‘पृथ्वीनारायण शाहं येँ देता राजधानी दयकः सेलिं दरवारया नासः चुकय् ख्वप देया प्याखं क्यं बलय् ‘प्याखंयां थानाय्गु हे बांला’ धःगु व प्याखं पुचया ल्या अप्व-दगुलिं हे च्वमिं ख्वप देता ‘नाचगानया राजधानी’ धःगु खाँ सिय् दः ।

नौ बाजाया खायँ गेट भेकनरया ग्वाहालीं च्वमिं म्हासिइका पिब्वयो दी घाँ (तः तः पुगु बर्व फै या डखं कयकः तःगु), बाद्य जात्राया गुलाँबाजा, धाँचा, (ताल) विइगु ढलक, धिमाय्चा, पश्चिमा, (पंख बाजा थजगु ढलक ल्या), क्वा खिंचा (बाँसुरी थजगु ताः हाकगु सहनाई), नगरा (थौं कन्हे उलि मछ्यःगु), अलय मुहालीं (ताहाकगु तिं या बाजा) लालाखिं (मादलथेँ) तें नेजु व भ्यूयालीचात अलय् स्तोत्र हालिपुं, आरती च्याकः आरति बिइपुं फुक्क मुनिबलय यक्व मनूतय्गु दफ्फा दै ।’ श्व बाजा त नपां भजन याइपुं पुचःता दाफा धाई । गुकिया निति मल्ल इलय हे गुथि व बूया आयस्ता तयो तः गु दः ।

नौ बाजाया अर्थ गुताजि बाजा दःगु पुचः गुता जात मुडः दयकगु भजन पुचः धाय्गु क्यं । थुकियाय् खायँ गेट भेकनर व च्वमिं नं नुवागु खानय मरु ।

च्वमि भाजुं बाजा स्यनिपुं व

सच्चिद स्वंगु स्वप पौ. ब.छि पौ(पाक्षिक)

सय्किपिनिगु धार्मिक, तान्त्रिक व रहस्यात्मक अनुष्ठानया बारे नं न्हि थाडः तःगु दः । नासः द्यो व हैमा द्योया बारे गेट भेकनर व च्वमिता नं भाय्या अर्थज्याय मफयो जुई थाकु चःगु खानय दः । गुकिं उकिया धात्थेंगु खाँ ज्याय मफः । च्वमिया धापु काथं नास द्यो यां भारतया नाट्येश्वर व नटराज नपां ज्वःला । अलय 'हैमाद्यो' 'हर्य्या द्योया मिसा' धायो च्वयो तःगु च्वमिया खाँ मिलय मजु । उकी दीक्षा काइपिनिगु धापू काथं 'हैमाद्यो' या अर्थ हनुमान वा ग्या तांक बिड्महा द्यो काथं मनोवैज्ञानिक अनुष्ठानया अंग खः ।

ख्वपया सङ्गीतया खायँ च्वमिं थथे मूल्याङ्कन याडः दी 'संगीतकार पिनिगु ल्या श्व देया जनसंख्याया (औसत) ल्याखाड स्वयगु खः सा हलिमयया न्ह्यागुनं दे (शहर) स्वयो अपः दः ।' (पृष्ठ ६)

देवी प्याखं, भैल प्याखं, ख्याप्याखं, नागाचा प्याखं, नी च्यान्हतक न्हि न्हिं क्यनिगु महाभारतया लिधंसाय दय्क तःगु खः प्याखं, नवदुर्गा प्याखं थीथी ख्वपया थुगु प्याखंया खायँ च्वमिया मूल्याङ्कन छक स्वय-हलिमय्या प्याखंया पहः (नृत्य क्रियासं) लय भादगाउँ (ख्वप) या प्याखंया थः गुहे च्व जःगु पह दः ।' च्वमि ख्वपया प्याखंता हलिमय्या मेमेगु प्याखं नपां लाडः स्वगु दः ।

थुजगु प्याखंया खायँ च्वमिकय् भाय् बांलाकः मथूगुलिं गुलिं मखुगु खाँ नं च्वयो द्युगु दः । उकिता बांलाक थुइकः व्यवस्थित काथं च्वगु जूसा थयं मध्यं ५० पा ६० पा या छगू साफू हे दैगु जुई ।

ख्वप देया प्याखंता च्वजायकः मूल्याङ्कन याडः च्वः छायो च्वंसां नं तन्त्र, मन्त्र, अवचेतन, दार्शनिक चिन्तन नपां स्वाडः सहमत जुयता थाकु । थुकिया छगु दसु ' तान्त्रिक तथ्यसं

ख्वपां: ख्वः तपुइगुया न्हापांगु अभिप्राय हे स्वकुमि पिनिगु ध्यान भातिचा च्वजायकेगु (जागृत) व (स्वप्नको चेतना) म्हगसया चेतनां तापाकय्गु खः । नासः द्योया छगू स्वकुं लागू प्वः व हैमा द्योया स्वकुंलाकु स्वप्व : या रहस्य काड-दी-'संगीतसं 'खाँवः' हे मू तत्व जुई, थुगु तत्वया पञ्चमहाभूतनपां स्वापु तयो स्वयबल्य् डागू तत्व मध्ये आकास तत्व नपां मिलय जू व । भीसं थौं कन्हे आकाशवाणी न्यनय्ता खाँव व आकासया स्वापु थुइकेता तापाक्क वानय् म्वँ । उकी संगीत व प्याखं स्यनिम्हा द्यो आकाशता मानय् याइगु तार्किक व वैज्ञानिक नं खः । अः आकाशता गथे मूर्तिखय ज्यायगु ? आकास खानय् मदय्कः कुडः च्वंगु थसय्या कोठायी आँगः तछयाय्गु हे अःपुगु ज्या खः । ... भक्तिभक्काउ मूर्तिखय् स्वयो आकासया प्रतिक प्वाल्य ध्यान चिडः तय्ता स्वर (सः) या साधक पिन्ता अः पुई ।'

ख्वप देया म्यँ, प्याखंया अध्ययन याय्ता थानाया थःगु पहः (मौलिकता) या खायँ नं बिचः याय्मः । श्व खायँ च्वमिया बांलागु ध्यान वांगु खानय् दः । मिखातिसिड सुयातां बांला बांमला धाय्गु पाय्छी मखु । क्वय्या वुंदाखं च्वमिया सतर्कता गुलिदः धाय्गु क्यं । (पृष्ठ-५ व ६)


१) बाह्मासे माल श्री विद्यापति ब्रम्हानन्दया च्वसा (रचना) काथं हाली । जयदेवं संस्कृत्य च्वगु गीतगोविन्द हे

हाली । मेमेगु अपलं स्रोतखय् धःसा संस्कृत, बज्रभाषा, मैथली भाय् छ्यःसां विभक्ति व क्रिया धःसा नेपाल भाषा याय् हे छ्यली । नेव भाषं च्वयो तः गु श्लोक नं हाली । (पृष्ठ ४)

२) भारतया केरला राज्यया 'कथकली नृत्य' तान्त्रिक नृत्यता तिसावस व ख्वःपा थें जक ज्यागुलि जकं हे अलमल याई । (पृष्ठ - ७)

३) खयां प्रसंगसं बाद्यबादन, बाजा हे नं थाना यँ देशय्सं थमनं हे दय्कः पिथांगु मखु । नवबाजा भारतया अकवरया दरवारया नकाशा खानासं दःगु खः । चः चा (चर्चा) हालय् पद्धति बड्गालं हे वगु खः । कर्नाटकया संगतिया ज्यासलं ब्वयों वगु मिगुली व हिन्दुस्तानी संगीतिया परम्परा थानाया संगीतय् अपलं दः । (पृष्ठ - १०)

४) ख्वपया (म्यँ हालय्गु बाजं थाय्गु प्याखं ल्ह्यगु) गाना बजाना खय् भारत वर्षया अपलं म्यँ, बाजा, प्याखंनय् लिचवः



सच्छिव स्तंगुगु स्वप पौ, बःछि पौ(पाक्षिक)

- लागू दः। (पृष्ठ-११)
- ५) द्यो ल्हाय्गु बाजा थाइबल्य उगु बाजाख्य च्वाकं च्वाकं काइगु विषम ताल्य सूदुर पूर्व एशियाली बाजा थाइगु ताल नपां मिल्य जू व (पृष्ठ-११)
- ६) ... ख्वपया न्हापा निसैंया पारम्पारिक गायन वादन, च्वयोतःगु क्षेत्र, शास्त्रीय गायन, शास्त्रीय नृत्यया मुद्रा ज्यायगु व प्याखं ख्वार्यै (चाल) खः सां व भारतं वा तिब्बतया ज्ञान केन्द्र गुम्बापाखं वगु परम्पराता नं घाडः नपां थाना हे ख्वपया जन साधारणया लुमुगु ज्यासलय छुयो पार्यै तयो दय्कगु प्याखंया बांलागु रूप खः । थानाया बुँज्यामिया लोक नृत्यया छुँ भाति किचां दः सां ख्वपया पारम्पारिक नाचगानया विधाता लोकम्यै व लोकप्याखं खं श्वकगु धाय् मछिं । (पृष्ठ ३६)

अजगु प्याखं म्यै या जग निः स्वांपुं न्हयलुवा पिनिगु बारे च्वमिं तप्यंका धायो द्यगु दः - ख्वपया जुजु जयस्थिति म ल म (सन् १३८२ - १४५२) ता हे नेपः या स्वनिगलय यक्व यक्व दाँ लिपा पुनर्जागरण (हकनं दाडः वगु) व दय्कगु (निर्माण यागू) युग न्ह्याकम्हा धायो जश बियो च्वंगु दः । (पृष्ठ १२) व बाहेकं - थजगु प्याखं ल्हूय्गु, म्यै हालय्गुलि थः थःगु पहः दुथ्याक सेलिं वा थुकिया पह दयक सेलिं व सांस्कृतिक जागरणया ख्वः पिलुवगू इलय्या ख्वपया कलाप्रेमी जुजुपुं, शास्त्रया ज्ञाता गुभाजुपुं व म्यै, प्याखंता न्हूगु पहः बियगु मतिं हज्याडः वपुं नायोपुं मिलय जुयो ज्यासांगु

- पृष्ठ खानय दः । (पृष्ठ-१३)
- अथेनं आर्य व हिन्दूपाखं मंगोल (रक्त) हि यायपुं व बौद्ध धर्मालम्बी पुं ज्यापु जनतातय्थाय् थ्यं बलय् नेसदा उच्च शास्त्रीय गायन, प्याखं व संस्कृत भाय व साहित्य बारे अज्ञान नेवः तयसं थौतक धार्मिक भावना वपूखाया सम्पति काथं ब्वलांक तः बलय् उकि अनेक अशुद्धि विकृति वयो खतं नय धुकल । च्वमिया भाषं

गुब्ले गुब्ले यां मचापहः हे खानय दः । मचातय्गु कासाथे च्वं (पृष्ठ १६)

३) ... थाना अः हाल वयो च्वंगु सड्गीत व प्याखं नेगुलि शास्त्रीय स्वरूपया सर्वाङ्ग लक्षण मरुसां स्थानीय मूलया हिल वगु भाय् ब्युत्पन्न धुनया पहः ल्वाकः ज्यागु जूसां म्हुतुं जक हालय्गु मौलिक परम्परा न्ह्याकः न्ह्याक यंकसेलिं (पूर्ण स्वरूपं)धात्थेंगु पहलय् छुँ भाति स्यडः विकार वगु व बारबार अभ्यास मयासैं म्हुँ जकया अभ्यासं स्यंकथे च्वंसां सड्गीत श्व सड्गीत व नृत्य प्रबन्ध म्यै व प्रबन्ध प्याखं खः । (पृष्ठ २२)

४) पारम्परिक काथं हालय्गु-थाय्गुलि गनां आयबुसे च्वंक लिसाकायो, दोहरेयाड धाइगु, गुलि खाली कर्मकाण्ड पू वांकय्ता जक लिसालिसा कायो हालः, थाडः च्वनिगु गुलिं ब्यक्तिगत व थःगु हे प बन्धी करणाता ज्वय्केता हे क्वत्यल छ्वइगु गनां थाइम्हासियागु कमिता साधनं पू वांकय्गु पति वेवास्ता याडः छखय् लिइकः छ्वयतानिगु बानीं अपलं त्रुतित खानय दःगु खः । (पृष्ठ ५५)

- व म्यै प्याखंया पहः थथे दः ।
- १) संस्कृत स्रोतया अप्रभंश तुत्ता हालय्गु चिच्याहांगुतःहांगु याडः यक्व दः। (पृष्ठ ४)
- २) व म्यै व प्याखंया स्तर उथें मग्यं । गान-बजानसं परम्परित राग व थातता कायो स्थानीय धुनसं नपां थाना याय् पिसं यागु हिलापहः पिब्वबलय् नं अपलं थासय् त्रुति जूगुलिं संगीतज्ञपिसं न्यंबलय्

वामलागू खोटत कुबियो नं थौयाभिं व बांला (शुभ लाभ) खय् जक दुब्वाइगु पुँजीवादी व छस्वयो जि छु कम धायो हानथापया युगय् ख्वप देया जनतां पुलां पुलांगु प्याखं ल्यंकः म्वाकः तःगुली च्वमि भाजु तस्कं लय् तः नपां गथे याडः म्वाकः तला जुइ दक अजुगति नं चः । वयक व दाफा व प्याखं पुच या गुरुपुं, दुजः पुं व शिष्य पिनिपाखं तस्कं बांलागु लिचवः लाकः

चवंगु दः । वयर्क याडः द्यगु चिन्तन व कायो द्यगुचिन्ता धात्थे खयकः शिक्षा व संस्कृति मन्त्रालय, साहित्य एकेडमी व त्रिभुवन विश्वविद्यालय व पुरातत्व विभागं काय् मःगु खः ।

नेवः समाज्य नं संस्कृतिया बाजा गाजाया जक थी थी बोल व न्हि ज्याइगु सड्केतं 'सांस्कृतिक सम्पन्नता' (तःमिगु सांस्कृति) खःदक क्यनयगुली नं च्वमि लिपा मला 'नायखिं बाजा धाय बलय् छताजिया ढोलक व सिछ्याचा धाय्गु छज्वः बाजा दै । उगु बाजा थाडः त्वालय् त्वालय् सरकारं क्वः छिगु खौं सूचं व ढवखौं च्वयकेगु याई । 'नायखिं च्वयकेगु' या अर्थ थौं कन्हे नं 'प्रचारयाय्गु' काथं काई । वहे बाजाया थी थी पाक-पाक थाइगु बोलं समाज व जनताया घटना व न्हि ज्या कानय्गु ज्यायासा च्वमिं थथे काडः दी - 'खास खास पर्वया म्येँ प्याखं इहिपा बलय् थाइगु ताल, मेगु सी बलय् थाइगु, मेगु, सीथाय् यंकी बलय् नं मेता मितः बलय् (दागबती बिइबलय्) मेता अलय् सी उइबलय् मेता अलय् श्व फुक्क कर्मकाण्ड नपांया स्वापु फुक्क विधि विधानं चिड तःगु दै । (पृष्ठ३४) नायखिं बाजाया खायँ च्वमिं धायो दि -थुगु नायखिं थाइगु पहः पुलांपुलांगु व थानाया थःगु हे स्थानीय शैली हे खः ।

अथेहे नवदुर्गाया '... मोहनीबलय् तलेजुई प्याखं ल्हइगु चाल छताजि, लाँप्याखं मेता हे, छुनं द्योछँया हःनय् थ्यनय्वं ल्हइगु प्याखं मेता हे अलय् श्व फुक्क पहः परम्परांजक मखु परिस्थिति व धर्मकाण्ड वा उबलेया स्थितिं चिडःतःगु दः ।'

बाजा व प्याखं थमनं हनय मखांसां बाजाया बोल जक न्यड हे छु प्याखं पुचः त वयो च्वना, गना थ्यना अलय् छु प्याखं ल्हयोच्वना धाय्गु खौं फुक्कासिनं धाय्थे थुई । उलिजकमखु उमेरे दःपुं थाकालिपुं

मनूतयसं नवदुर्गा व मेमेगु प्याखंया डाधौ च्याधौया बाखंचु गना थ्यना जक बाजाया ताल न्यडः जक धाय्फः । सांस्कृतिक जीवन पद्धतिया छगु नमुना श्वहे खः । गाई तय्सँ हालिगु छपु छपु म्येँ खं ऋत्तु व महत्वपूर्ण दिनत पत्रां धः थें धाय फः । श्वहे खौं दाफा, भजन, नखा-चखा व प्याखंया बोलं धाई । संगीतमय, लयबद्ध, नियमितता विविधता व व्यवस्थित जीवन पद्धति हे तःमिगु संस्कृतिया छगु चिन्ह व द्योतक (छापा) खः ।

ख्वप देया सांस्कृतिक जीवनया छगु महत्वपूर्ण खौं ख्वप दे चा हिलिपुं वा सांस्कृतिक पुचः व चाडपर्व सं द्योगण वा द्यो हैगु छगु द्योलाँ निश्चित लाँपु दः । उगु लाँ नगरया फुक्क धाय्थे मूम देगः द्योत व मूम त्वालय् थ्यनि । सम्भव तः व लाँपु हे ख्वप देया दकलय पुलांगु बस्तीत वा त्वः त स्वाक तःगु लाँपु जुयमः।

च्वमिं वहे खौंयाता धायोदिल - बाजा थाड चाहिलिगु लाँपुथःगु हे दः। व थासय् जात्रा चाहिइकिगु वा मूम नखातं बिस्क-बिस्कं पुचः त प्याखं ल्हयो, म्येँ हाल, चामुइकिगु परम्परा निसें हे क्वःछिडतःगु दः । सापारु बलय् चाहिलिगु लाँपुतिं फुक्क ख्वपदेता थियो क्यंकः तः गु दः । थुगु लाँपु चा दांकयता स्वधौ ति ढ्यु ।

सापारु (गाईजात्रा) याय् खायँ च्वमिं थथे बयान याडः दी - '... न्हिच्छित्तक साँचा, अलय् च्याकु हिकु ताः हाकम्हा परासी वा गा खं भुडः हम्हा ताहामचा (समायाडः हःगु ल्योसिं द्यो थें) चाहिइक तई । छश्व छगु ताहासाँ (प्याखं) या ल्यूनयँ व हःनयँ बाजाया तालय् तितिं न्ह्यो प्याखं ल्हयो वानिपुं मिजं मचातय्गु पुचः दै । दाच्छिया छक थथे प्याखं ल्हय्गु कुतः ख्वप देशय् सच्छीम्हा खय् न्ह्यःम्हा (७० प्रतिशत)

मिजं मचातयसं याय्गु चलन दःसेलिं थुगु ख्वप देशय् मचात बलय् निसें प्याखं ल्हय्गु मति, बोल व म्येँया तालया ज्ञान, पिनय् त्वालय् लाछी लायँ प्याखं ल्हयता मछालिगु मखुत ।' सांस्कृतिक ज्याइवः या मूम थाय् लुइक च्वमि भाजुं धायो दी - श्व ढलंढ मचापुं ल्याम्होपुं प्याखंम्वः त पाखं थः थः गु पुचः ता न्हैपुं प्याखं म्वः त ल्यय्गु मौका नं दत । थजगु अपलं अपः यक्वतःहांक तः ब्याक अभ्यास याइगु थाय् जिं गनानं मखाडा, गुगु थासय् मखाडा । श्व प्रथा न्हयाडः चवंतलय् थुकिया मूल गुब्लें सुइ मखु ।

ख्वपया छम्हा छम्हा मिजं मचा मिसामचापिसं स्वजक स्वयो अःपुक हे व चाहिलिगु लाँपु घेतांघिसि, नवदुर्गा, मेमेगु थमनं स्युगु प्याखेंतय्गु खौं सः, स्यु, थू । थूकाथं ख्वप देया सांस्कृतिक जीवनपद्धतिया च्वमि राणा जुं साफूया उखय् थुखय् मोती हवः थें हवलः ब्युगु दः । ब्यवस्थित याडः ख्वपया सांस्कृतिक जीवनया खौं च्वसा न्हयाकय्गु फुसंद दःगु खः सा वयकलं व उखय् थुखय् लाडः चवंगु मोती सिडः मोती मँ हानिगु विश्वास याय् छिं ।

थजगु संस्कृतिं समायाडः तःगु नेवः जातिया जक म्येँ बाजा व प्याखंत ल्यंकः म्वाकः तय्गु ज्याखय् स्वापु दगु छुं नं लागां च्युता मतः गुलिं वयकलं धायोदिल -'थुकिता ल्यंकः म्वाकः तय्गु चासो सुननं यागु खानय् मरु ।' 'थुकिता ल्यंकः म्वाकः तय्गु लिपा लाकः च्वनय् मज्यु' अलय् अपलं प्याखंत अः ताड, मदयो वानय् तांगु दः । उकिं थुकिता ल्यंकः म्वाकः तय्गु खः सा थौं तक श्व प्याखं म्वाकः तय्ता कुबियो च्वपुं नायोपिन्ता मन च्वजाय्केगु ज्या याडः थाकाय्मः । वनं मथां हे । इलं भीता लेंः च्वनिमखु ।

(कथहँ)

हिं स्वकगु नगर सभासं नगर प्रमुख प्रजापतिजु या न्वचुः

जिपुं नेकगू कार्यकालया लागिं निर्वाचनं त्याक वयागु च्याला दत । जिमिता त्याकः द्यपुं सकलें हानय् बहपुं नगरबासी पिन्ता थौया दिनय् दुनुगलनिसे सम्मानयासे सुभाय देछायो च्वडा । छिकपिसं ब्यगु अमूल्य मतं याडः जिमिसं ख्वप नगरया विकास व थुकिता समृद्धि याय्गु जिम्मेवारी वगु खः । थौं हिंस्वकगु नगरसभा च्वडः च्वडा । स्थानीय सरकार सञ्चालन ऐन २०७४ या दफा १९ सय् दाच्छिया नेकः नगरसभा च्वनय् मःगु कानुनी ब्यवस्था दः । नेपालया संविधान २०७२ रं संघ, प्रदेश व स्थानीय तह याडः स्वंगू तहया सरकारया ब्यवस्था याड तःगु दः । उगु सरकारया दथ्वी सहब्यवहारय् ज्या याय्मः धःसां थथे जुयो च्वंगु मरु ।

नगरसभा नगरपालिकाया ब्यवस्थापिका खः । सभां संविधान व कानुनं ब्यगु अधिकार छ्यलः नगरपालिकाता मःगु ऐन - कानुन नीति-नियम, निर्देशिका व कार्यविधित दय्कि । थ्व नगरपालिकाया सर्वोच्च निकाय खः ।

ख्वप देता ज्ञानविज्ञानया मू थाय् दय्केगु, पर्यटकीय गन्तब्यस्थल काथं ह्य्याय्गु व सांस्कृतिक नगर क्वः छिय्गु तातुडः ख्वप नगरपालिका हज्याडः च्वंगु दः । उकिया लागिं नगरपालिकां शिक्षा, स्वास्थ्य उपचार, संस्कृति व सम्पदा ल्यंकः म्वाकः तय्गु, कासा, सुचुकुचु व विकास निर्माणय् भी न्हयलुवा पिसं ख्वपदेया विकास व समृद्धियालागिं ह्य्याय्गु पलात अज हचिइकेता जिपुं मदिकक हज्याड च्वडा । जिपुं अःयाय्गु व लिपाथ्यंकया योजना दय्कः हज्याडः च्वडा । सम्पदा ल्यंकः म्वाकः तय्गु सुचुकुचु व मेमेगु विकास निर्माणया ज्या जिमिगु अः याय्गु योजना खः सा नेमकिपाया नायो भाजु नारायणमान बिजुक्छें (रोहित) जुं १०० दा लिपाया ख्वपदे सं खांगु म्हागस जिमिगु लिपा थ्यंकया तातुना खः ।

दायें दायें पतिकं सांस्कृतिक धिं धिं बल्लाय्या ग्वसः ग्वयो ज्या इवः न्ह्याकय्गु, सांस्कृतिक गुरुपिन्ता हानेज्या याय्गु, सम्पदा ल्यंकः म्वाकः तय्गु, भीगु थःगु हे पहलं छें दानिपिन्ता अनुदानया ब्यवस्था, थी थी विदेशी भाय स्यनय्गु तालिम व शिशु स्याहारनिसें कलेज तक चाय्क तयागु नपां विश्वविद्यालय चाय्केगु कुतः दीर्घकालीन तातुना पूर्वाकय्गु जिमिगु तयारीया पला खः ।

स्थानीय तहया विकासयालागिं पूर्ण स्वायत्तता मदयक मगा । स्वायत्तताया नामय् स्थानीय तहता संघ व प्रदेशया क्वत्यला हे अःयाय्गु मू समस्या खः । जिमिसं थी थी पंगः या दथ्वी ज्या न्ह्याकः च्वडा । कर्मचारी भर्ना अस्थायी व स्थायीया लागिं प्रदेश



लोकसेवाया ख्वः स्वयो च्वनय्मालिगु संघ व प्रदेश सरकारं अनुदान अप्वयकेगुपलि सशर्त बजेट अप्वयक च्वंगु व आर्थिक वर्षफूडथें- फुडथें च्वडानिं जक बजेट निकास छ्वयो हैगु ज्याखं स्थानीय तहं याइगु विकासया ज्याखय् बाँमलागु लिचवः लाडः च्वंगु दः ।

संघ, प्रदेश व स्थानीय स्वंगू तहया सरकारत स्वायत्त खः उकिं सुं सुयाय्गु अधीनय् च्वनय् म्वः धाय्गु संविधानया भावना खः । संघ व प्रदेश सरकारं स्थानीय तहता थःगु लाहापा द्रुलार्थया निकाय थें याडः व्यवहार याय्गु स्वायत्तता व संविधानया भावनाया अखः खः । जिमिसं सुयाय्गु हस्तक्षेप स्वीकार याय् फैमखु ।
ल्या चाः

थुगु नगरपालिकाया चालु आ.व. २०७९/८० या न्हापांगु खुल्लाया दुन्यें ७३ करोड ५ लाख व गुद्दतका धेवा आम्दानी जुगु खः, गुगु थुगुसीया अनुमानित आयया ३४.५३ प्रतिशत खः । अथेहे खर्च पाखे चालु आ.व. या खुल्लाखय् चालुपाखय् ५१ करोड ९९

सच्चिद्वत् स्तंगुगु स्वप पौ. ब.छि पौ(पाक्षिक)

लाख न्हयछद्द व पुँजीगत पाख्य ११ करोड ८२ लाख हिंप्यद्दः मुक्कं ६३ करोड ८१ लाख ८६ हजार खर्च जूगु दः । श्व मुक्क बजेटया २९.२२ प्रतिशत खः । नगरपालिकाया आन्तरिक आय पाख्य वृद्धियाड आम्दानी काथं सेवा प्रवाह व विकास निर्माण नपांया लागाय् माथांक खर्च याय्गु कुतः याडः च्वडागु दः ।

क. शिक्षा:

खप नगरपालिका पाखं नेगू इञ्जिनियरिड कजेजनपां च्यागू शैक्षिक संस्थात चाय्कः देशां देछिया ब्वनामिपिन्ता म्हवचा धेबां दांकः भिंकः बांलाकः शिक्षा बियो वयों च्वंगु धायो च्वनय् मालि थें मच्चं । थुगुसी पूर्वाञ्चल विश्वविद्यालय पाखं खप कलेज अफ ल चाय्केगु स्वीकृति कायो ६० गू सीटय् भर्ना कायो बी.ए. एल.एल. बीया कक्षा नं चाय्के धुंगु दः । अः खपया जनताया लागिं कानुन ब्वनय्ता जिल्लापिनय् वानय् म्वल । नगरपालिकां चाय्कः तःगु कलेजया लिचवः (नतिजा) नं च्व जयो च्वंगु दः । अःकानुन विषय नं च्व जःगु लिचवः काड्गु विश्वास याय् ।

नगर क्षेत्र दुनय चाय्कः तःगु सामुदायिक ब्वनय्कुथिया भौतिक सुधारया लागिं थुगुसी ३१ गू ब्वनय् कुथिता छगू छगू ब्वनय्कुथिता ५०,०००/- तका दां ल्याखं अनुदान, छगू ब्वनय्कुथिता साफूकुथि दय्केता, व्यवस्थापन व साफू न्याय्ता व ई-साफू कुथिया व्यवस्थायाय्ता ६,५०,०००/- तका दां विज्ञान प्रयोगशाला दय्केता छगू ब्वनय्कुथिता ६,५०,००० तका दां, बियगु कुतः याडःच्वडा । सामुदायिक ब्वनय्कुथि सुधार याडः शैक्षिक स्तर च्वजाय्केता नगरपालिकां मदिक कुतः याडः च्वंगु दः ।

ब्वनय् कुथिया शैक्षिक स्तर सुधार वा आन्तरिक धिं धिं बल्ला खं शैक्षिक गुणस्तरे अभिवृद्धिहय्ता उत्कृष्ट सिकाई उपलब्ध जूगु ब्वनय्कुथिता प्रोत्साहन अनुदान छगू छगू ब्वनय्कुथिता २,०००००/- तका दां व नमुना ब्वनय् कुथिया शैक्षिक व व्यवस्थापकीय योजना कार्यान्वयनया लागिं कार्य सम्पादन लिधंसाय् अनुदान छगू छगू ब्वनय् कुथिता ३० लाख निसैं ५० लाख तक बियगुकुतः याडः च्वडा ।

नगर दुनय्या विद्यालयस्तरीय ब्वनय्कुथि ब्यागु ब्वनामिपिनिगु शैक्षिक गुणस्तर ल्यंकः तयता थुगुसी निसैं एस.इ.इ. तयारी अभ्यास परीक्षा (टेष्ट परीक्षा) व वांगु दायें निसैं डागू तगिंया नगरस्तरीय वार्षिक परीक्षा न्ह्याकगु खः सा च्यागु तगिंया नगरस्तरीय परीक्षा त्वः मफिडक न्ह्याकः यंकागु दः । ब्वनय् कुथिसं न्हिनय्या खाजा व स्पानेटरी प्याड इड बियो च्वडागु दः ।

थुगुनगर दुनयया सामुदायिक ब्वनकुथिया शिक्षकपिन्ता थुगुसी शिक्षण सिकाइ प्रविधि (ICT) छ्यलय्गु तालिम व लेखा सम्बन्धी तालिम बिय धुंगु जुल ।

संस्कृति, इतिहास, अर्थशास्त्र, भूगोल, नेपालभाषा, राजनीति शास्त्र विषय उच्चशिक्षा ब्वनिपिन्ता बियो वगु छात्रवृति थुगुसी नं बियगु क्वः छिसे स्नातक व स्नातकोतर तगिंया बाहेकं थुगुसी राजनीतिशास्त्र व संस्कृति विषयलय एम. फिल/ विद्या वारिधि ब्वनिपुं स्वम्हासिता छात्रवृति वियागु दः । अः प्यम्हा ब्वनामिपिसं खप नगरपालिकाया छात्रवृति पाखं एमफिल व विद्यावारिधि याडः च्वंगु दः । अथेहे गरिब ब्वनामिपिन्ता बिड्गु शैक्षिक ऋण नं मदिक बियो च्वडागु दः । श्व नं हाँ ३१४ म्हा ब्वनामिपिसं डागु लाख तकाया दरं ऋण सुविधा कायो उच्च शिक्षा ब्वडः च्वंगुलि थुगुसी १५९ म्हा ताडः शैक्षिक ऋण बियागु दः । मुक्कं ४७३ म्हा ब्वनामिपिसं शैक्षिक ऋण पाखं उच्च शिक्षा ब्वनय्गु ह्वता च् लाकः च्वंगु दः ।

ख) स्वास्थ्य

जनताया स्वास्थ्यया खायँ खप नगरपालिका तस्कं सचेत, जुयो हज्याडः च्वंगु दः। स्वास्थ्यया लागाय् निजीकरणं हाँगःका कां वाडः च्वंगु थौं या इलय् स्थानीय तहलं अस्पताल चाय्केगु तस्कं चुनौतीपूर्ण खयानं जनताता अःपुकः मथां व गुणास्तरीय स्वास्थ्य सेवा बियगु जिमिगु तातुना खः । थीथी बाधा पंगःत दयानं नगरपालिकापाखं चाय्कः तयागु खप अस्पतालता २०७९ जेठ २३ गते बागमती प्रदेश सरकार पाखं १०० गू शय्या सञ्चालन अनुमति बिल । खप अस्पतालता जनतां भनभन विश्वास याडः वगु दः । मःकाथंया जनशक्तिया व्यवस्था याडः अस्पतालं मेगु सेवा त नं ताडः यंकय्गु कुतः याडः च्वडा ।

आ.व. २०७९/८० साउन निसैं पौष मसान्त तक खुल्लाय्ता दुनयँ खप अस्पतालं भक्तपुरयाय्पुं नपां थीथी ६० गू जिल्ला या मुक्कं १ लाख ६ हजार ४२६ म्हा विरामीपिन्ता स्वास्थ्य सेवा बिय धुंकल । न्हिं ७५० म्हास्वयो अपः ल्वगिपिन्ता स्वास्थ्य सेवा बियो वयो च्वंगु दः । खप नगरपालिका वडा नं ९ च्याम्हासिंगय् च्वंगु सामुदायिक आँखाकेन्द्र पाखं थुगु अवधिखय् मुक्कं १२,८६९ मिखाया ल्वगिपिन्ता उपचार सेवा बिय धुंकल । उलि मध्ये ३४३ म्हासिया मिखाया अप्रेशन यागु जुल । वहेइलय नगर आयुर्वेदिक स्वास्थ्य उपचार केन्द्र पाखं १३१० म्हा सिनं स्वास्थ्य उपचार कःगु दः । अथेहे खप नगरपालिका वडा नं ५ भगवती स्थान, वडा नं २ ब्यासी, व वडा नं. १ सल्लाधारी नःपली सृजनानगरय् च्वंगु जनस्वास्थ्य केन्द्र व सहरी स्वास्थ्य केन्द्र पाखं नं आधारभूत स्वास्थ्य सेवा ब्य ब्यं वयो च्वंगु दः ।

खप नगरपालिकाया ७३ कगू पलिस्था दिंया लसताय नेपाल मजदुर किसान पार्टीया नायो भाजु नारायणमान बिजुकुँ (रोहित) जु पाखं २०७९ पुस २ गते खप अस्पतालया न्हँगु भवन

उलेज्या व 'कोभिड नियन्त्रणमा भक्तपुर नगरपालिका' नांया साफ् चिखी फ्यनय् ज्या याडः द्यूगु खः । अःमः काथंया स्वास्थ्य सामग्रीत ताडः ख्वप अस्पतालया न्हँगु भवनं सेवा चाय्क ज्या छ्यलय् धुंकल । ख्वप अस्पतालं थुगु आ.व. निसँ मेमेगु सेवा नपां नुगः व मानसिक ल्वयया थप विशेषज्ञ सेवा न्ह्याकल ।

नगरवासी पिन्ता धेबा म्वायकः अक्सिजन व हिया व्यवस्थानं याडः वगु जुल । उकिया लागिं नगरपालिकां लाखौं तका दां खर्च याडः च्वंगु दः । छँ छँ नसिँड सेवाता अभ्र बांलाक यंकः वडा वडाय् दम-म्वसः व श्वास- प्रश्वासया ल्वयया शिविर, मिखाया शिविर, पाठेघर परीक्षण, नपां मेमेगु सामान्य ल्वयया स्वास्थ्य शिविरत त तं यंकगु दः । सामुदायिक ब्वनय्कुथि शुक्रबार पतिकं 'विद्यालय स्वास्थ्य कार्यक्रम' नं न्ह्याकगु दः । थुगुहे इलय् देश्य डांकः पुडः वगु डेंगु ल्वय् मपुंकः मडांकः पाडः तय्ता मः काथंया जनता ग्वाकय्गु ज्या इवः त हज्याका । जनताता स्वास्थ्य उपचारय् अः पुक काय्फ्यक्तेता वडा वडाय् आधारभूत स्वास्थ्य केन्द्रत न्ह्याक वयो च्वडागु दः सा ख्वप अस्पतालय् मचा बुइकिगु प्रसुति सेवा चाय्केगु कुतः याडः च्वडा ।

ख्वप नगरपालिका दुनयँ चाय्क तःगु सरकारी अस्पताल मध्ये भक्तपुर अस्पताल वागमती प्रदेशयाय् हे च्वः जःगु सेवा बिइगु अस्पताल व सहिद धर्मभक्त राष्ट्रिय केन्द्र देशादेछिया जनताता सेवा ब्यू ब्यू वयो च्वंगु दः । थुकाथं स्वास्थ्यया लागाय् स्वास्थ्य सेवासं जनताता मथां अपुकः स्वास्थ्य सेवा काय् फैगु थाय् ख्वप दे खः धःसा छुं पाइ मखु ।

ग) संस्कृति व सम्पदा ल्यंकः ग्वाकः तय्गुः

२०७२ सालया विनाशकारी तःभ्वखाचां स्यंकः ब्यूगु थुगु नगरपालिका दुनयया फुक्क धाय्थे सम्पदात ल्हवनय्-कानय व दानय् धुंगु दः । ल्यंगु छगू नेगू सम्पदात नं ल्हवनय् ज्या जुयो च्वंगु दः । थुगु आर्थिक वर्षया न्हापांगु खुलाया दुनयँ देगः स्वंगः, फल्चा डागु, द्योछँ छखा, पुखु छगः व मेगुयाडः ११ गू सम्पदात दानय् धुंगु जुल । उलि मध्ये ख्वप नगरपालिका वडा नं. ५ या बेतद्योया द्योछँ भजनघर व ल्वहँ हिति खःसा ८ वडाया दुबेकय्गु फल्चा व हरिशङ्करया देगः, वन्ती फल्चा, महेश्वरीया नेगू सतः तः खः । अः च्याग देगः, डागू फल्चा, द्योछँ नेखा व मेगु प्यंगु याडः नीछगू सतः सम्पदात ल्हवनय्कानय व दानय्गु ज्या जुयो च्वंगु दः । ख्वप नगरपालिका वडा नं. ३ लाय्कुलीया थन्थू दरबार दानय्ता नगर प्रमुखया नायोसुई पुनःनिर्माण समिति निःस्वाडः ज्या हज्याकय् धुन ।

दायँ दायँ थें थुगुसी नं सापारु बलय् पिब्वगु सांस्कृतिक विद्याया धिं धिं बल्ला याय्गु निर्वाचनया घोषणा पत्र काथं जनताया सुभावाव न्यडः धिं धिं बल्ला याय् ।

घ) कासा

ख्वप नगरपालिकाया ग्वसालय् थुगुसी नगर ब्यागु ब्वनय्कुथि ब्यागु कासाया धिंधिं बल्ला न्हिल्याः २०७९ पुस ५ निसँ ९ गते तक याडः क्वचाल । ७९ गू ब्वनय्कुथि ब्वति कःगु उगु धिंधिंबल्लासं २६९८ म्हा कासामिपिसं हिप्यंगू विधाख्य् ब्वतिकःगु खः । २०७९ फागुन ५ गते निसँ ९ गते तक अन्तरनगर खो खोया धिं धिं बल्ला याय्गु जुयो च्वंगु दः । उकिता नगरपालिकां मः थें तयारी याडः च्वंगु दः । थी थी खुगू कासाया मदिक्क स्यनय् ज्या (प्रशिक्षण) नपां कासाया लागिं पूर्वाधारत दय्क च्वडागु दः । उकि मध्ये ख्वप नगरपालिका ८ नं वडाय् कभर्ड हल दय्क न्ह्याकय् धुंकल सा १० नं वडा महालक्ष्मी स्थानय् कभर्डहल दय्कः च्वंगु दः । नागरिकपिनिगु स्वास्थ्यता बिचः याडः खुल्ला ब्यायामशालाय् न्हँ न्हँ सामानत ताडः अभ्र बांलाकय्गु जुयो च्वंगु दः । अथेहे ख्वप नगरपालिका पाखं प्रशिक्षक प्रशिक्षण तालिम न्ह्याक च्वंगु नपां थी थी खुगु कासात भलिबल, कबड्डी, तेक्वान्डो, उसु, कराँते, एथलेटिक्स कासाय् राष्ट्रपति कप कासाया धिं धिं बल्ला नं क्वचाल ।

यँ महानगरपालिकाया ग्वसालय् जूगु मेयर कप तेक्वान्डो धिं धिं बल्ला सं ख्वप नगरपालिका ल्यू या ल्यू लागु दः । युवापिन्ता सक्रिय यायां समाजय् ह्यूपा ह्युता ल्यासे-ल्याम्होपिनिगु भूमिका विषयसं वडा-वडाय् अन्तरक्रिया जुयो च्वंगु दः ।

ङ) वातावरण व सुचुकुचुः

फोहर थासय् लाकय्ता थाकुयो च्वंगु जिमिता चुनैति थें खः । ख्वपदे न्ह्याब्लें यचु-पिचुकय्ता नगरबासी पिन्ता मदिक्क ग्वाकय्गु ज्याइवः यायां छँ नं प्याहाँ वैगु फोहर ध्वगिइगु व ध्वमगिगु बिस्कं बिस्कं तय्क मुंकय बियागु दः । ध्वगिगु फोहरं नेपाली (कम्पोष्ट) सः, दय्क किसानतय्ता दांकः मियो वयो च्वडागु खः सा छँ छँ कम्पोष्ट बिन बियो, अःपुक कः सि खेती याकय्ता तालिम बियो वयागु दः। लच्छिया नेकः १ गते व १५ गते जनप्रतिनिधि, कर्मचारी, स्थानीय टीम - क्लब नपाँ मुडः थाय् थासय् सफाई अभियान न्ह्याकः च्वडागुलिं नगरता यचु पिचुक तय्ता ग्वाहाली जूगु दः ।

च) त्वनयगु नाः

त्वनयगु नाः या समस्या ज्यंकय्गु जिमिगु कुतः मदिक्क न्ह्याडः च्वंगु दः । उकियालागि काठमाण्डौं उपत्यका खानेपानी बोर्ड नपां मिलय जुयो ज्या याडः च्वडा , ख्वपदेया क्वः नय् मेलम्चीया नाः वसेलि छुं भाति अःपुगु दः । नगरकोट्या नाः मः छि मरुगुलिं नगरया थःनय् पाखय्या जनताता त्वनयगु नाखं दुःख जूगु दः । समस्या ज्यंकय्ता मेलम्चीया नाः हे मदय्कःमगा । अः न्हँगु पाइप लाइन तय्केता जिमिसं कुतः याडः च्वडागु दः । व

सच्चिद स्वंगु स्वप पौ. ब.छि पौ(पाक्षिक)

बाहेकं थाय् थासय् डीप बेरिड याडः त्वनय्गु नाः इडः वयो च्वडागुलि थुगुसी ख्वप नगरपालिका वडा नं. १ सल्लाघारी च्वंगु 'दुग्ध चिस्यान केन्द्र' नपां डीप बेरिड याडः त्वनय्गु नाः इड वियगु मतिं ३ लाख लिटर न्हयंगु नाः ट्यांकी दय्कः च्वंगु दः अथेहे वडा नं. ९ तुमचो-दुगुरे चोखाया लागाय् नं डीप बेरिडया नाः इडः बियगु कुतः याडः च्वडागु दः ।

छ) युवा व रोजगार

ल्यासे ल्याम्होपिन्ता थःगु तुतिखय दानय् फय्कः लाहातय् ज्या दैगु तालिमत ब्यू ब्यू वयागु दः। थौं कन्हे युवात व महिलातय्ता स्वयो ज्वरय् याय्गु (पाक शिक्षा), साँ च्याकय्गु, आधारभूत सुज्या सुयगु व बुटिक तालिम बियगु नपां चिनिया भाय् व जापानिज भाय् स्यनय्ता नं मःगु ब्यवस्था याडः च्वडागु दः । अथेहे नेपाल सरकारं ब्यूगु 'युवा उद्यमशील ऋण अनुदान लक्षित समूहतक थयंकय्ता मः काथंया ज्या इवः त हज्याक च्वडागु दः । महिला उद्यमीपिन्ता प्रविधि ग्वाहाली याडः, बियगु नेपाल सरकारया ज्या इवः पाखं वगु अनुदान ग्वाहाली विडकेता नं कुतः जुयो च्वंगु दः ।

ज) कृषि

नगर दुनयया कृषकपिन्ता नेपाल सरकारं अनुदान बियो तःगु देसी सः (रासायनिक मल) बियता डिलरसीप कायो तःपुं सहकारी संस्था तय्ता इलय-ब्यलय कृषि सामग्री कम्पनी लि.- पाखं ब्यूगु ल्या (विवरण) काथं युरिया, व डि.ए.पी. सः हयो बियता सिफारिस नपां सःमियता डिलरसीपया लागिं नियमकाथं थी थी सहकारी संस्था तय्ता सिफारिस बियो च्वडागु दः। कृषक पिन्ता कृषि तालिम ब्यूब्यू कम्पोष्ट मल छ्यलय्ता घ्वाडः च्वडागु, चाया उर्वराशक्ति अप्वयकेता कृषि चुन दांकः इडः बियो वयो च्वडागु दः ।

क) सहकारी

धेबा मुडः तः पूं वचतकर्ता पिनिगु धेबा ज्वडः सहकारी चाय्कच्वंपुं बिसेवाना धाय्गु खाँ वयो च्वंगुली अथे जुय हाँ हे भ्नीसं सहकारी न्ह्याकामि व वचतकर्तातनपां तःक हे बैठक च्वडः ग्वाकः वयागु खः अथेनं नगरदुनयया छगू नेगू सहकारीपाखं बचतकर्ता पिनिगु बचतया धेबा लितामबिला धाय्गु खाँ नं वयो च्वंगु मरुगु मखु । जनताया दुःख न्यनय्गु काथं स्वापु दःगु सहकारी संस्थाया पदाधिकारीपुं व बचत कर्तापुं नपां मंकः बैठक च्वडः समस्या जयंकय्गु कुतः याडः च्वडागु द । ख्वप नगरपालिकाय् थजगु गुनासोत वयालिं सञ्चालक व पदाधिकारी पिनिगु नामय् जिल्ला प्रशासन कार्यालय् भक्तपुरे मः काथंया कार्वाहीया लागिं पौ च्वयो भूमिसुधार व मालपोत कार्यालय भक्तपुर व काभ्रेपलाञ्चोक नपांया थासय् छँ जग्गा व अचल सम्पति रोक्का याय्ता पौ च्वय धुंगु दः ।

सहकारी संस्थाय् मुनय् हःगु धेबा स्थानीय स्रोत व साधन परिचालन जुइगु काथं छँ छइगु थासय् लाय् छ्यलय्ता छलफल

हज्याक च्वडागु दः ।अलय् इलय-ब्यलय सहकारी संस्थाया लेखा प्रणाली व ब्यवस्थापकीय ज्यात सफ्टवेयर पाखं न्ह्याकय्ता तालिम बियो च्वडा ।

ग) पर्यटनः

पर्यटन ख्वप नगरपालिकाया आम्दानीया धुकुथे खः । ख्वपदेता पर्यटकीय गन्तब्यस्थल काथं हछ्याय्गु कुतः जिमिसं याडः च्वडा । नगरया पर्यटन च्वजाय्केगु मतिं सम्पदा पदयात्रा नपां योमारी ब्वज्या नपां सांस्कृतिक ब्वज्या नकतिनि जक धाय्थे क्वचाल । पर्यटक पिन्ता सेवा सुविधात वियता ख्वप नगरपालिका वडा नं. ९ दतात्रयसं पर्यटक शौचालय नपांया पर्यटक सूचं केन्द्र तयो सञ्चालन याडागु नपांवडा नं. २ ब्यासी पर्यटन सूचना व सेवा केन्द्रसं मःकाथंया फर्निचर, कम्प्यूटर व टेलिभिजन थजगु तयो अभ् बांलाक, व्यवस्था याडागु दः । अथेहे नगरया सुरक्षा ब्यवस्थाया लागि सीसी क्यामरा व सडक बती तय्गु ज्या जुयो च्वंगु दः ।

कोभिड महामारी, रूस- युक्रेन युद्ध, डेड्गु महामारी नपां बांमलागु लिचवः लाकगु पर्यटन उद्योगं बुलुहुँ सास ल्हाय् फयो वगु दः । चालु आ.व. या न्हापांया खुल्लाखय (साउन निसे पुस तक) ७३, ५७५ म्हा विदेशी पर्यटकत ख्वप दे चाह्यु वगु खः। श्व थाब्ने स्वयो ६२,९७३ म्हा खं अपः खः । थुगुइलय पर्यटन लागां ६ करोड ८८ लाख व ड्यप्यद्व व च्यास तका अलय स्वद्व व खुस व पी डार्का डलर आम्दानी जगू दः ।

ट) विकास निर्माण

ख्वप नगरपालिका वडा नं ३ या हनुमन्ते खुसी बाराही ताँ दय्क च्वंगु, वडा नं ७ हनुमानघाट नेगू सुधारिएको शवदाह गृह दय्के धुंगु जुल । नपां वडा नं १ सिद्धपोखरीया दक्षिणय् पाखय् नःपुखुया उत्तर पश्चिम पाखय् याडः नेगु गाडी व मोटर साइकल पार्किङ्ग दय्के धुंगु दः । वडा नं. ६ छ्यो पुखुचाय् आदर निकेतनया भवन व १० वडा महालक्ष्मीस्थाने जनस्वास्थ्य केन्द्र भवन दानिगु जुयो च्वंगु दः । व बाहेकं वडा वडाय् अपां सियगु, ल्वहँ तं सियगु नपां मेमेगु विकास निर्माणया ज्या जुयो च्वंगु दः । शीतभण्डार दय्केगु ज्या हज्याकसे वडा नं. ९ ब्रम्हायणी ताँ क्वचाइ थें च्वंगु दःसा ८ वडा लिवाली च्वंगु लर्केताँ दानय् तांगु दः । हनुमन्ते करिडोर दय्केता थाय् थासय् रिटेनिड वाल दानय्गु ज्या जुयो च्वंगु दः ।

ठ) मेमेगु (विविध)

- १) ख्वप नगरपालिका भू उपयोग परिषद निः स्वाडः थुगु नगरक्षेत्र कृषि क्षेत्र मरुगु खाँ क्वः छिड स्वापु दःगु कार्यालय जानकारी छ्वयधुन ।
- २) नगरपालिकाया नगर प्रहरी ऐन २०७५ य् व्यवस्था याडः तः काथं नगर प्रहरी व्यवस्थापन याय्ता ज्या हज्याकागु जुल ।
- ३) नगर दुनय् गल्ली खिचात मदय्केता खिचातय्ता बन्ध्याकरण

सच्चिद्व स्तंगुगु स्वप पौ, बःछि पौ(पाक्षिक)

- याकः रेबिजविरुद्धया खोप बियो चवडागु दः ।
- ४) थुगु नगरपालिकापाखं न्ह्याकः च्वंगु देको -मिबा- इतापाके आवास योजनाया नक्सा स्वीकृत याडः छसिकाथं लालपूर्जा इडः वियो च्वंगु दः ।
- ५) ख्वप टेलिभिजन चाय्केता मःकाथंया अनुमति कायो स्टुडियो दानय्गु व जनशक्ति ब्वलांकय्गु ज्या जुयो च्वंगु दः ।
- ६) थुगुसी नगरपालिकापाखं चाय्कः तःगु ख्वप बहुप्राविधिक अध्ययन संस्थानं ख्वप नगरपालिकापाखं चाय्कः तः गू १०० गू शय्याया अस्पतालया लिधंसाय् नर्सिड कक्षा हकनं न्ह्याकगु जुल ।
- ७) ख्वप नगरपालिकापाखं चाय्कः तःगु जनज्योति पुस्तकालयता ई-लाइब्रेरी काथं हज्याकय्गु ज्या क्वचाई थें च्वन ।
- ८) अपाङ्गता जुपुं मनूतय्ता स्वयो थीथी ग्वाहाली काथं सामानत इड बिल ।
- ९) चालु आ.व. या खुल्लाया दुनय् सामाजिक सुरक्षा भत्ताता न्हपांगु व न्यकगु किस्ता याडः मुक्कं १४ करोड ४५ लाख ५९ हजार६५४ तका इडः बिल ।
- १०) इलय ब्यलय बजार अनुगमन याडः मज्यूकाथं ज्या या पिन्ता कानुनं धः थें दण्ड जरिवाना याडः वयो च्वंगु दः ।
- ११) थुगु नगरपालिकाया राजस्व मुनय्गु अनलाइन भुक्तानी प्रणाली पाखं याय्ता ई-सेवा खल्ली व कनेक्ट आइपिएस कम्पनीत नपां

- मः काथं सम्भौता याडः परीक्षण कारोबार हज्याकल ।
- १२) चालु आ.व. या खुल्लाख्य थुगु नगरपालिका दुनय १५६ गू न्हुंगु नक्सा दर्ता जुलसा १६८ गू नक्सा पास जुल ।
- १३) थुगु नगरपालिकाया पुलांगु नक्सा फाइलत डिजिटाइजेसन याय्गु ज्या जुयो च्वंगु दः । अः तकख्य २८०० गू (१९ प्रतिशत) डिजिटाइजेशन सिधयकः, ल्यंदःगु नं ज्या याडः च्वंगु दः ।
- १४) ख्वप नगरपालिकाया पलिस्था दिया लसताय ज्या साडः च्वपुं कर्मचारी पिन्ता च्वछाय्गु मति उत्कृष्ट कर्मचारी पिन्ता हानय्ज्या यात ।
- १५) प्रतिनिधि सभा व प्रदेश सभा सदस्य निर्वाचन तः लाकय्ता मतदाता शिक्षा ज्या इवः व मः काथं प्रचार याय्ता स्वास्थ्य स्वयमसेवकत हचिइकः छँ छँ ज्या इवः न्ह्याकगु नपां निर्वाचन नपां स्वापु दःगु मः काथंया ज्यात अःपुकय्ता ज्या यागु जुल ।
- १६) चालु आ.व. २०७९/८० या न्हपांगु खुल्ला दुनय् कडा ल्वय जुपुं नगरबासीपिनिगु लागिं नेपाल सरकार पाखं बिइगु सुविधाया लागिं १२० म्हा विरामीपिन्ता विपन्नया सिफारिस नपां नगरपालिकां विइगु छम्हा सिता १५,००० ।- तका दां काथं ग्वाहाली यात ।
- (माघ २३ गते जुगु ख्वप नगरपालिकाया हिंस्वकगू नगरसभा सं ख्वप नगर प्रमुख सुनिल प्रजापतिया न्वचुया भाय् हिला- सं.)



(सर्वतःबलती)

कर्णाली प्रदेशाय् नेमकिपाया संगठन हकनं

बल्लाड वगु दः



सुनिल प्रजापति केन्द्रीय दुजःनेमकिपा

नेमकिपा पूँजीवादी सरकारे वाडः ह्युपा वै धायगु खायँ विश्वास याइ मखु । मन्त्री जुयगु मति दः पुं मनुत आखिर भीगु पार्टी त्वः त शासक दलय् द्रहँ वाना ।

३) न्हयसः पश्चिमाञ्चल नेपालय् न्हपायाय्थें हे संगठन बल्लाक हय् फ़ै तिनिला ?

लिसः पश्चिमाञ्चलय् नेमकिपा न्हपायाय् थें जक मखु व स्वयो अज बांलाड वैगु जिमिता विश्वास दः । अः अपलं बुद्धिजीवीपिसं संसदय् नेमकिपा मरुगु जुसा प्रमुख प्रतिपक्ष हे दै मखु धायो च्वंगु दः । नेमकिपां याडः वयो च्वंगु सिद्धान्तया राजनीतियाडः पार्टी म्हेगः स्वयो थौं भन स्यल्लाड, बल्लाड वयो च्वंगु दः । जिमिसं मेगु पार्टी थें धेबा इड, भ्वयनकः, वयाड बिय थव याड बिय दक भुट्टा आशवासन इड भोट मफ्वडा । इमान्दार जुयो भोट बिल धः सा जिमिसं देश व जनताया सेवा याय् धाया । वहे काथं भोट वगु दः । गुली जिमिता भोट बिला व बिचः व सिद्धान्तया भोट खः । वयक पिनिगु भोट याता सम्मान यासे इमान्दार जुयो जनताया सेवा याडः चवडागु जुल ।

४) न्हयसः संसदीय व स्थानीय तहया दथी छु पा थें ?

लिसः संसद धायगु बौद्धिक विचार कालबिल (विमर्स) यायगु थाय् खः । ऐन कानून दयकेगु व जन विरोधी विधेयक व प्रस्तावया विरोध यायगु नपां देश व जनताता भिं जुडगु कानूनत दयकिगु थाय् खः । स्थानीय तह कार्यकारी भूमिका म्हितिगु थाय् खः । आना वाड संविधान व कानूनं बियो तःगु फुक्क ज्यात जनताया भिं खय् छ्यलयगु खः । थमनं हे कानून दयकेगु न्यायवियगु व दण्ड-सजाय बियगु तकया अधिकार अः स्थानीय तहता बियो तःगु दः । व्यवस्थापिका, न्यायपालिका व कार्यपालिका स्वंगु अंगया फुक्क (पूर्ण रूपं) काथं न्ह्याकय् फःगु व छ्यलय् फःगु थाय् स्थानीय तह खः । खवप नगरपालिकां थव फुक्क पालना याडः बांलाक ज्या साड च्वंगु दः । उकीं फुक्क सिनं खवप नगरपालिकाता ब्वस्यलागु दक धायो च्वंगु खः ।

५) न्हयसः संसद व स्थानीय तहलय् ज्या साडा बलयया थःगु अनुभवत काडः दीला थें ?

लिसः संघ व प्रदेश सभा नीतिनिर्माण याइगु थाय् खः । जिमिसं समाजवादी देशया संविधानत खस (नेपाली) भाषं भाय् हिलः संविधान सभाया ६०१ म्हा सांसद पिन्ता इडः बिया, अध्ययन

१) न्हयसः नेपाल मजदुर किसान पार्टी पलिस्था याय् मःगुछाय् अलय् भेरी कर्णालीसं नेमकिपाया अवस्था छु गथे दः थें ?

लिसः नेपाल मजदुर किसान पार्टी पलिस्था याड ४९ दाया लसताय नेमकिपाया पासापुं जिल्ला जिल्ला वाडः पार्टी पलिस्थादिं या ज्याइवः याडः वयो च्वंगु दः। वहे इवलय् कर्णाली प्रदेशया जिम्मा कुबियो सुर्खेत, जुम्ला, कालिकोट जुयो थौं दैलेख वयो चवडा । अः थी थी जिल्लाय् हकनं वानय् मनि ।

२) न्हयसः न्हपा तस्कं बल्लागु नेमकिपा अः गथे कमजोर जुला ?

लिसः राजनीतिसं इलय-ब्यलय् थाब्बा-क्वब्बा जुयो हे च्वनी । गुब्ले हज्याइगु व गुब्ले रक्षात्मक स्थिति च्वनय् मालिगु तः हांगु खाँ मखु । पञ्चायतया इलय निसें हे नेमकिपां कर्णाली व भेरी अञ्चलय् सङ्गठन यायां वगु खः । थव थाय्या जनतातय्ता पञ्चायतया विरोधय् राजनीतिक चेतनां ग्वाकः छप्पाछुधियाडः यंकय्गु ज्या दकलय् न्हःपां नेपाल मजदुर किसान पार्टी यागु खः। अः नं नेमकिपाया संगठन भेरी व कर्णाली बां लालां वयो च्वंगु दः। पञ्चायती व्यवस्था क्वदय् तांगु इलय तक अथेधाय्गु २०४६ साल तक जिमिगु संगठन मेपिनिगु स्वयो स्यल्ला, बल्ला । २०४८ साल लिपा नं जुम्ला, दैलेख जिल्लाय् जिमिपुं प्रतिनिधिपुं त्याकः वगु खः । नेम्हाप्यम्हा स्वार्थी व अवसरवादी पिसं जनताता मिखालय् धुलं छ्वाकः भांःग लाता । गुकीं जनताया मन फ्यासुल । अथेनं अः बुलुहुँ जनता राजनीतिक चेतना, ग्वाकः हज्याडः च्वंगु दः ।

सुं नं मनु थगु व्यक्तिगत स्वार्थ कय कुडः, अवसर पिडः च्वनय्गु याः सा अजपुं मनु पार्टी टेकय् जुयो च्वनय् फ़ै मखु ।

सच्चिद्वत् स्तंगुगु स्वप पौ, बःछि पौ(पाक्षिक)

यो धायो । जिमिसं थ्व न्हूंगु संविधानय् फछिंफक्व समाजवादी विशेषता तकय्गु अपलं कुतः याडा ।

अःयाय्गु स्थानीय तहलय् वाडाबलय् शिक्षा, स्वास्थ्य, विकास निर्माणया बांलागू बन्दोवस्त याय्गुलि (ब्यस्ट) लीमलाक जुयो च्वडा । जिपुं न्ह्याथाय् हे वांसां देश व जनताया सेवा याय्गु खः । पार्टी छु भाला बिई वहे थासय् च्वडः जनताया सेवा याय्गु खः ।

६) न्ह्यसः संविधान व जनआन्दोलनया भावना थुङ्कः थ्व सरकार हज्याडः च्वंगू दला लय ?

लिसः संविधानं स्थानीय तहता स्वायत्तता बियो तःगु दः । प्रदेश व संघ सरकार धाय्गु नीति निर्माण याय्गु थाय् जुय मः गुलि अःवयो चिच्या चिच्या हांगु ज्यातनपां संघ व प्रदेशं याडः च्वंगु दः । स्थानीय तहता मः पुं कर्मचारी नपां संघ व प्रदेशं छ्वयो हेगु । कर्मचारीनपां तय् मरुगु छुकिया सरकार ? संघ व प्रदेश स्थानीय तहता कंकुं क्यंकय्गु कुतः याडः च्वंगु दः । थःगु लाहापा द्रुलायंतयो तय्गु नियन्त्रित संघीयता छ्यलय्गु कुतः याडः च्वंगु दः । गुगु नेपः मि पिसं स्वीकारे याय् फैमखु । थ्व संविधानया भावना काथं मिलय नं मजु ।

७) न्ह्यसः नेपाली कांग्रेसेता प्रतिपक्ष भूमिका ब्यूगुली छिगु छु घापु दः थें ?

लिसः निरंकुशता थी थी रूप कायो वइ । व काथं जिमिसं थुङ्कः च्वडा । कानूनय् प्रष्ट च्वयोतःगु अधिकार नं छ्यलिमखु सरकारं । कानून काथं संविधानया प्रावधानया अखः सभामुखं नेपाली कांग्रेसेता प्रमुख प्रतिपक्ष दल खः दक क्वः छियगु सभामुखया गलत ज्या खः । थमनं हे दयकगु कानून संसदं हे पालना मयागुलिं अःजनतां कानून पालना यो धाय्गु नैतिक अधिकार नं थ्व सरकारकय् मदय धुंकला । प्रमुख प्रतिपक्ष दल नेमकिपाता क्वः छिय मःगु अथेनं मया । पुँजीवादी व्यवस्था धाय्गु थमनं दयकागु कानून थमनं हे हांचा गायो वानिगु ब्यवस्था खः धाय्गु सिय दत ।

८) न्ह्यसः नेपः या प्रजातान्त्रिक अभ्यास निरंकुश जुं वाडः च्वंगु दः धाय् ताजागु खः ला ?

लिसः पुँजीवाद धाय्गु पुँजीपति वर्गया थः यत्थें याइगु तानाशाही खः। थ्व धायो च्वनय मःगु खाँ मखु । अलय् थुकिता गुकाथं हछ्याय्गु धाय्गु खाँ सरकारे च्वंपिसं विचःयाय् मःगु खः । अःधःसा 'छनं सुंक च्वँ जिनं सुंक च्वनयँ नेम्हा मिलय् जुयो नय्' धःथें जुयो च्वंगु जुला प्रतिपक्षय् च्वनय् मःम्हा नेपाली कांग्रेसे नेगू प्यंगू पदया आशां प्रचण्डता समर्थन यो वांगुलीं नेपालय् पश्चिमेली प्रजातन्त्र असफल जूगु क्यं । उकिं अः नेपालय् चिनियाँ पहया प्रजातन्त्र हःज्याड वयो च्वंगु दः धाइपुं नं दः ।

९) न्ह्यसः रवि लामिछानेया नागरिकता सारेजीया विषय छिगु छु घापु दः थें ?

लिसः रवि लामिछाने छुँ छुगू विशेष पार्टीया दुजः मखु नेपाली नागरिक खः । नेपःमि पिसं पालना याय् मःगु कानून वयकं नं पालना याय्मः थुकिया खाँ न्यायालयं नुवाय धुंगु दः । थुकि मेपुं सामान्य नागरिक पिनिगु लागिं लागु याइगु विषय वयकया हकय् नं लागु जुगु खः धाय्गु काथं थुङ्कसा बांलाई । भीगु कानूनय् सुननं विदेशी नागरिकता कालकिं नेपाली नागरिकता स्वतः खारेज जुइगु व्यवस्था दः । भीम्हा नागरिक जुयमः सां नं कानूनी प्रक्रिया दः । विदेशया नागरिकता त्याग याय् धुकः पुलांगु नागरिकता निरन्तरता काय फैगु भीगु कानून ब्यवस्था याडः तःगु दः । वयकलं अजगु निवेदन विय लुमांकला जुयमः । उगु खाँय निर्वाचन आयोगं इलय हे बिचःयागु जूसा थथे मजुइगु खःला ? पदय् च्वपुं जूसां मच्वपुं जूसां नेपःमि पिनिगु लागिं कानून उथें हे खः । विदेशी नागरिकता काय धुपुं मनुतय्सं निर्वाचनय् ब्वति काय धुक बिचः हे मयासिं उम्मेदवार सदर यागु निर्वाचन आयोगया कमजोरी खः ।

१०) न्ह्यसः दकलय लिपा, स्वप नगरपालिका जनताप्रति उत्तरदायी नगरपालिका गथे जुय फता ?

लिसः ख्वप नगरपालिका शिक्षा, स्वास्थ्य, सम्पदा ल्यंक तय्गु, सुचुकुचुता हदाय्तयो, जनताता हदाय तयो ज्या न्ह्याकः च्वंगु दः । शिक्षाखय् छ्यःगु लाय गुब्लें नं सितिं मवानिगुलिं ख्वप नगरपालिकां च्यागु शैक्षिक संस्थात/कलेजत न्ह्याक च्वंगु दः । न्हपानिसें चाय्क तःगु कलेजय् न्हूँ न्हूँगु विषयता ताडः दांकःभिक सेवा ब्यू ब्यू वयो च्वंगु दः । शैक्षिक ऋण व छात्रवृत्तिया ब्यवस्था याडः तःगु दः । छुँ छुँ नर्सिड सेवा, ख्वप अस्पताल, दय्कः चायक स्वास्थ्य लागाय् ज्या साड च्वंगु दः ।

थुकाथं निर्वाचित जनप्रतिनिधिपिसं इमानदार जुयो ज्या सांसा थः थः गु थाय् व लागु विकास याय् फैगु बांलागु दसु ख्वप नगरपालिका खः । थःगु तुतिखय् थः हे दानय् फःसा जक लिपा थयंकया दिगो विकास याय् फैगु खाँ थुङ्कः आत्मनिर्भर मजुसैं मगा । विदेशीया भरय् स्वाबलम्बी जुय फैमखु धाय्गु जिमिगु मान्यता खः । विकास निर्माणया ज्याखय् जनसहभागीता व थःगु धाय्गु भावना ब्वलांकः ज्यासांकेगुलि बः बियो वयागु दः । विकासनिर्माणया ज्यात न्ह्यकनय् स्वयर्थे पारदर्शी याड वयागु दः । छिकपिसं नं थःथःगु नगरपालिकाय् जनप्रतिनिधिपुं नपां च्वड थः थः गु थाय्या छु छु याय् फै धाय्गु सम्भाव्यता अध्ययन याडः बजेटया छ्यला खः थाय् छ्यय्केता जनता सक्रिय जुयमः । मेपुं वयो भीगु थाय् या विकास याडः बिइ मखु थःगु थाय् थमनं हे विकास याय् मः ।

(नेपाल मजदुर किसान पार्टीया केन्द्रीय दुजः नपां ख्वप नगरपालिकाया प्रमुख सुनिल प्रजापतिजुं दैलेखया रेडियो 'हाम्रो समावेशी एफ.एम. ता शनिवार (माघ १४ गते) ब्यूगु अन्तर्वार्ताया भाय् हिला -सं.)

निवार्चनया इलय जनतां न्यंगु न्हयसःया स्वायँ

विवेक

नेपाल मजदुर किसान पार्टीया ४३ कगू पलिस्था दिया लसताय् जिल्ला-जिल्लाय् पार्टी प्रशिक्षण न्ह्याकः च्वंगु दः । थ्व हे इवल्य नकतिनि क्वचःगु प्रदेशसभा व प्रतिनिधिसभा निवार्चनता लिफः स्वयंगु ज्या जुयो च्वंगु दः । उगु इलय् जनतां न्यंगु अपलं जिज्ञासात व न्हयसः या खायँ पार्टी कार्यकर्ता पिनि दशवी अपलं खँलाबल्हा नं जुल । उकिमध्ये छुं छुं महत्वपूर्ण विषयया खाँत प्रष्ट यायगु कुतः याय् ।

जनताया नुगः खाँया न्हयसःतः-

- १) भोत नेमकिपाता वियगु त्यातकिं मेगुपार्टी वानिगु अः लिपा नं थये जुइमखु दक गथे धाय् फँ ?
- २) नकतिनिजक पलिस्था यागु दल तयसं यक्व सांसदत त्याकला, अलय् नेमकिपां त्याक्य् मफू गथे ?
- ३) नेमकिपां मति तः काथंया समाजवाद गुड्ले दै ?
- ४) निवार्चनबलय् मेपुं ध्यबा प्वः ज्वड दै अलय् नेमकिपा ?

भोत नेमकिपाता

निवार्चनया इलय् नेपाल मजदुर किसान पार्टीया कार्यकर्तात गां-गामय् वांगु इलय् थजगु अपलं न्हयसत यागु न्यनय् दः । अथे धायगु अपलं पश्चिम नेपःया जिल्ला -जिल्लाय् । उब्ले कर्णाली व भेरी अञ्चलय् निरंकुश पञ्चायती व्यवस्थाया विरुद्धय राजनीतिया प्वा तयगु ज्या नेपाल मजदुर किसान पार्टी यागु खः । अजगु जिल्लात मध्ये गुलिं जिल्लाय् २०४६ सालया आन्दोलनया न्हयलुवाय् नं नेपाल मजदुर किसान पार्टी यागु खः । बहुदलीय व्यवस्था पुनःस्थापना लिपा जुम्ला, दैलेख नपांया जिल्लाय् नेमकिपा पाखं तःकहे प्रतिनिधिसभा, गाउँपालिका व जिविसया दुजःपुं त्याकला । जनतां विश्वास यापुं गुलिनं प्रतिनिधिपिसं पार्टी त्वः त जनताता विश्वासघात याता । अलय् पार्टीता नं धोखा बिला । थुकी गुलि राजनीतिक चेतनां मगवापुं जनताया मन फ्यासुला । निराश जुला । उकीं अः नं नेमकिपाया उम्मेदवारपिन्ता शंकाया मिखालं स्वयो च्वंगु दः ।

छम्हा - छम्हा उम्मेदवारपिन्ता शंकाया मिखालं स्वयसयकेगु धःसा जनताकय चेतनास्तर जायो वगुया दसुखः । जुम्लां दिल्ली महत्, भक्त वहादुर रोकाया, दैलेखं विनोद शाही पिन्ता जनतां त्याकः छ्वता । अलय अमिसं थःगु जक भिं स्वयो, ब्यक्तिगत स्वार्थ तपुयो अनुशासनहीन ज्या साना । गुकीं जनतां असन्तोष प्वंकः तं पिकाला । बदलाया भावना मरुसा अजपुं मनूत पाखं हकनं हकनं जनताता मिखालय् धुलं छ्वाकी । ईख मरुम्हा मनू व विष मरुम्हा सर्पता सुननं तेरे याइमखु धःथे अः नेपःमि पिसं धोकेबाज पिन्ता बदला कायगु भावनां ज्या सानय् मः ।

छम्हा नेम्हा त्याक वापुं मनूतयसं बेईमान याय्वं हे छु

चुनावय् भाग कायगु हे मिलय् मजु घायगुला ? मखु, मभिंगु ज्या याइपुं मनूत न्हयाथाय् नं दै । चुनावय् त्याक वापुं जक मखु मेपुंनं स्यपुं दः । अजपुं मनूत पाखं जनताता थप सचेत यायगु राजनैतिक कार्यकर्ता पिनिगु कर्तव्य नं खः । पूँजीवादी दलतयसं क्रान्तिकारी पार्टीतय्ता हःनय् वानिदक पंगः थाडः बिई । छम्हा नेम्हाजक क्रान्तिकारीपुं संसदय् थं बलय् पूँजीवादी पिसं आपासिकं समस्या वगु तायकी मखु । गुड्ले निवार्चनं त्याकः अपलं क्रान्तिकारीपुं संसदय् थ्यनी उब्ले पूँजीपति वर्गया स्वार्थया विरोध याई उब्ले पूँजीपति वर्ग निर्मम काथं न्ह्यो छ्वयता नं लिफः स्वइमखु ।

भारतया उदाहरण छक स्वय । सन १९५७ सं केरालाय् वामपन्थीतयसं प्रान्तीय संसदय् बहुमत हला । सरकार गठन नं याता । वामपन्थी सरकार शिक्षा, स्वास्थ्य, भूमि सुधार थजगु प्रगतिशील ज्या याडः हः बलय् पूँजीपतिवर्गया न्ह्यो मवल । बिपक्षी दलतयसं आन्दोलनया नामय् थाय थासय् बम मुडकः, मितयगु थजगु ज्या याडः हला । केन्द्रीय सरकारं आनाया सरकार भंग याता अलय् राष्ट्रपति शासन न्ह्याकला । अथेहे सन १९६५ खय् जूगु निवार्चनय् नं आनाया वामपन्थी तयसं चुनावय् भाग काला । चुनाव जुय हाँ हे आनाया कम्युनिष्ट पार्टीया नेता पिन्ता देशद्रोहीया द्वपं बियो कुना । निवार्चनय् जेलय् च्वपुं नेतात हे त्याता अथेनं ज्या सांक्य मब्बू । उगु संसदता नं भंग याडः हकनं राष्ट्रपति शासनहे लागू याता । अथेयां पश्चिम बंगालय नं सन १९७० सं जनमोर्चाया सरकारं आनाया जनताया आन्दोलन न्ह्यो छ्वयगु, ज्या मयागु त्वहः तयो केन्द्रीय सरकारं वाममोर्चाया सरकारनं विघटन याडः बिला ।

शासक दलपिसं सच्चा क्रान्तिकारी व देशभक्त पार्टीया नेता, कार्यकर्तापिन्ता निराश अलय् लाँपु त्वःत बिसिक्य् छ्वयता जनताया पाखं त्याकः वापुं कार्यकर्तापिन्ता धेवा वा छुं भौतिक सुख सुविधाया लोभ क्यडः थःगु पार्टी दुकाय्ता स्वइगु, उकिं ज्या काय् मफूसा भौतिक रूपं सिध्यक बिइगु वा अकिनं अपुं तः मलासा अन्तर्राष्ट्रिय शक्तिया ग्वाहली कायो बहुमतया सरकार भंग याडः सेनाया बलं शासन सत्ता न्ह्याकयगु कुनियतं दुष्प्रयास नपां याई । उकीं क्रान्तिकारी पार्टीदुनय छम्हा नेम्हासिं धोका विइगु, विश्वासघाट याइगु तहांगु खाँ मखु ।

नकतिनिजक पालिस्था यागु दलं अपलं थासय् संसदपुं त्याकला धायगु खाँय नं उलि अजु चाय् म्वँ । साम्राज्यवादी व विस्तारवादी तयसं थी थी देशय् थः पुं दलालत ब्वलांकय्ता अरबौ तका लाय् तयो जुई । अपुं थी थी मिडिया, गैर सरकारी वा अन्तर्राष्ट्रिय गैर सरकारी संस्थाया नामय च्वडः च्वनि । सञ्चार माध्यम जनताता थःगु प्रभावय् लाक्य् फँगू दकलय स्यल्लागू ज्याभःजगुलिं अमेरिकी गुप्तचर

विभाग (सिआइए) व भारतीय गुप्तचर विभाग (रअ) पाखं दुनं दुनं (गुप्तरूपं) अजगु थासय् अपलं लाय् छ्यलः च्वनि । अमिसं तप्यंक लाकः काय्गु स्वयो गुगु देया राजनीतिख्य् थमनं लाहा तय्गु खः वहे देया नागरिकपुं मध्ये दलालत ब्वलांक तै । च्वयथ्यंक आखः ब्वनय्ता छात्रवृत्ति बियाजिलाला, वा विश्व बैंक, अन्तर्राष्ट्रिय मुद्राकोष थजगु यक्व यक्व तलब दैगु थासय् जागीर बियां जिलाला न्ह्याथय् याडः जुसां थः पुं इमानदार च्यो भ्वातिंत ब्वलांकी । टेलिभिजन व थीथी न्हिपौ वापौ पाखं जनताता बांलागु लिच्वः लाकय् फःपिन्त ग्वाहाली याई । अजपुं मनु हे कन्हे सरकारया महत्वपूर्ण पदय ह्यो राजनीति थःगु लाहातय काई । नकतिनि बूगु पार्टी अपलं दुजः पुं त्याकगुया खाँ बलुहु सीय दयो वै ।

पुलांगु, पार्टीया खायँ नेकाया नेतात डा. राम शरण महत, डा. प्रकाश शरण महत, डा. मिनेन्द्र रिजाल, डा. नारायण खड्का, अमरेश कुमार सिंह थजपुं उकिया दसु खः । २०४६ साल लिपा डा. रामशरण महत अर्थमन्त्री जू बलय वं उद्योग धन्दात निजीकरण याय्गु नीति दय्कला । थौं देया स्वामित्वदःगु फुककं धाय्थे कल कारखानात पुँजीपति तय्गु लाहातय लः ल्हाडः बिला । वं ब्वनय्कथि, कलेज, विश्व विद्यालय, अस्पताल नपां सार्वजनिक संस्थानत नपां निजी याता । उकिंयाडः थौं देश कङ्गाल जुजुं वान । भारतं अपलं अमरेश कुमार थजपुं दय्कः नेपः या राजनीतिया तँचा थःगु लाहातय ततं वयो च्वंगु दः । नेपालय राष्ट्रपति, प्रधानमन्त्री, रक्षा व गृहमन्त्री नपां प्रदेशया मुख्य मन्त्रीत नपां सुयाता दय्केगु धाय्गु खाँ अः दिल्लीं क्वः छिड्गु अवस्था वयो च्वंगु दः । थजगु इलय नेका, एमाले व माओवादी थजगु दलत तःतः हाडः वैगु अजु चायपुगु खाँ मखु । नेकाया १२ कगु महाधिवेशनया लागिं नेका या उब्लेया सभापति सुशिल कोइरालां भारतीय नेता प्रणव मुखर्जी कय् धेवा (आर्थिक) ग्वाहाली, फ्वंगु, कृष्ण सिटौलां भापाया ग्वँ व रामचन्द्र या (वञ्ज) व्यापारीतय्के कायो करोडौं तका दां सुशिल कोइरालाता ब्युगु खाँ अः नकतिनि प्याहाँ वगु देवप्रकाश त्रिपाठी जुं च्वगु तुषानल साफू (पेज १७४) खय् न्हि थाडः तःगु दः । शासक दलत सुयाय्गु इशाराय् हज्याडः च्वना धाय्गु खाँ सिङ्केता थजगु छगू नेगू घटना स्वयवं हे गा ।

नेमकिपां धःगु थजगु समाजवाद गुल्ले वै ?

जनता राजनैतिक रूपं ग्वाकः छप्पा छधिजुयो हज्याय मफूतलय देशय समाजवादी क्रान्ति याय् फैं मखु । समाजवादी व्यवस्था निःस्वानय्ता देशया वातावरण जक दयां मगा अन्तर्राष्ट्रिय परिस्थिति नं तयार जुयम । नेपः या शासक नां जकया कथित कम्युनिष्ट पार्टीत समाजवादया भजन जक याडः पुँजीवादता अज बल्लाकय्ता ज्यान पाडः जुयोच्वंगु दः । उकीं समाजवादी व्यवस्था निः स्वानय्ता छगू ऐतिहासिक यूग बिय फः । जनताकय् धैर्यता दय्मः धेवा कायो, चाकुगु माकुगु विकासया फय् खाँ न्यडः भोत विड्पुं जनता दः तलय नेपाल मजदुर किसान पार्टीया आजू- काथंया समाजवादी क्रान्ति अज तापनि अथेनं निराश जुयमः गु थाय नं मरु छाय् धःसा पुँजीवादया

विकल्प समाजवाद हे खः ।

मेपूं करोडौं धेवा ज्वडः वैगु अलय् नेमकिपा ... ? थजगु खायँ जनता व राजनीतिक कार्यकर्तापिसं छु खाँ थुङ्के मःलय् धः सा व धेवा अमिगु थःगु मखु । व विदेशीया धेवा खः । नेपः या राजनीति थःगु लाहातय लाकय्ता छ्यःगु विदेशी लाय् खः । विदेशी धेवा ज्वडः नेपालय् राजनीति याड्पुं यक्व नेतात दः । अपुं भिंगति जुयो सी मखु । माओवादीं भारतया ग्वाहालीं नेपालय् सशस्त्र संघर्ष याता । नेपः या अपलं धन-जनया क्षतिजुल । माओवादीं गणतन्त्र अमिगु बलिदानं हयागु दाबी याः सां धात्थेगु खाँ भारतं नेपःया राजनीति थःगु लाहातय लाकय्ता माओवादी त हछ्यागु खः । घटनां थथे हे धायो च्वंगु दः ।

नयाँ दिल्ली जुगु १२ बुँदे सम्भौता, गुकि धात्थेगु अन्तर्राष्ट्रिय, शक्ति व नेपाली सेना व माओवादी लडाकु संयुक्त राष्ट्र संघ स्वयगु (निगरानी) याडः तःगु बुँदा नपां च्वयो तःगु दः । नेपाल मजदूर किसान पार्टी उगु ध्वलय् असहमति प्वंकः सम्भौताख्य हस्ताक्षर याय्गु व विरोधनं याय्गु नीति कःगु खः । थौं अमिगु भरपदौं शक्ति भारत व नेपाली सेना संयुक्त राष्ट्रसंघया नामय अमेरिका धाय्गु खाँ सिय दः । १२ बुँदे सम्भौतां नेपालय् राजतन्त्रजक ल्यं थांगु मखु बरु भारत व अमेरिकां तप्यंक क्वत्तलय्गु, (हस्तक्षेप याय्गु) वातावरण दय्कला । अमिगु विरुद्ध नेपःया राजनीतिक दलं सास हे ल्हाय मफैगु अवस्था थ्यंगु दः । नेपाली जनताया तच्च्वगु, विरोध दय्कं -दय्कं प्रतिनिधिसभां एमसीसी पास जुगु अमेरिकी सैनिकत नेपालय् द्वहँ वयता खापा चाय्क वियगु थें खः सा एसपी पी अज क्वातुगु ग्वाहाली जू वांगु दः । नेमकिपाया विरोधं याडः हे एसपीपी प्रस्ताव दिक्ु यागु दः । उकिता खारेज मयातलय् मदिक्क विरोध याडं तुं च्वनय् मः । नागरिकता विधेयकं लाखौं भारतीय तय्ता नागरिकता बिड्केगु वहे लाँपु ज्वडः वगु खः । उकीं अजगु संघी सम्भौता व विधेयकता पारित याडः शासक दल पिसं न्हपा अमेरिका व भारतकय् कःगु ऋणया ब्याज पुल च्वंगु दः ।

धात्थे नेपाल मजदुर किसान पार्टी चुनावय धेवा ह्वल, म्वः मरुगु आशवासन बियो, भव्यं नक चुनाव त्याकी मखु । चुनावता जनताया चेतना स्तर स्वइगु ब्यारोमिटर काथं काई । जनताता राजनैतिक रूपं ज्यायाकय् थाय् अथे धाय विश्व विद्यालय काथं काई, वहे काथं काई, वहे काथं छ्यली छ्यल च्वंगु दः । थुकी ग्वःम्हा संघ व प्रदेश सभाय् त्याकला धाय्गु स्वयो बिचः याता कः घाडः न्ह्यलुवा जुयो च्वंगु मू खाँ खः ।

नेमकिपां थःगु सिद्धान्त काथं व्यवहार नं याडः च्वंगु दः । बहुदलीय व्यवस्था हकनं हय धुंकः लिपाया राजनैतिक इतिहासता स्वयगु खः सा देश व जनताया इमानदार जुयो सेवा याय्गु, सिद्धान्त व बिचःया राजनीति याड्गु पार्टीं नेमकिपा छगू जक खः धाय्गु सिय दः । का.रोहित जुं धायो द्यूकाथं - 'धेवा कमे याय् थाकुमजु इज्जत कमेयाय् थाकु ।' धात्थे अः नेमकिपाया राजनीतिक उचाईं भन भन च्व जायो च्वंगु दः ।

स्वम्ह ब्रम्हवाज्यापिं

तापाक छगु गामे ब्रम्हुतय स्वम्ह दाजु किजानिपिगु परिवार छगु दयाचवन । न्हापांला स्वम्हं वाज्यापिं मिलेचले जुया जीवन हना च्वंगु ख । लिपा विधि विवाह सिधल । अथे जूवले मिसा तयेगु कोठा वाखनं याना ईपिं नाप चवना नयेगु थाकुया वल । “आ थथे चवनां मजिल, व्यागः जुया हे चवने माल” धयागुलि स्वम्हं सहमत जुल । सम्पति इना काय्गु खं जूवले छम्ह दाजु- यात छेँ काल, छम्हसित वुँ काल, कान्छाम्हसित जयमांत जक बिल । तःधिकपिं वाज्यापिनिला ज्यु हे धायमा । छम्हसिया छेँ हे दत, छम्हसिया वुँ दत नयेत छु थाकू मजु । उखे कान्छाम्ह वाज्याया खालि जयमांतय्गु जक भरे चवनाचवने माः । वया पूजा धाः वसा छुं भतिचा नयेगु दत, पूजा धाः मबसा नयेगु हे मदु ।



“भि छु याना नयेगु ? नयेगु छुं हे मदु ।” कलाम्हं न्हि न्हि खं न्यकिगुला द हे दनि । जयमा मुक्क जक कया चवन ।

“हाले मत्य छन्हु कि छन्हुला पूजा धायेक महईला ?” भातम्हं धाल ।

अथे जुजुं छन्हुया दिने छम्ह तःमीम्ह हे जयमांयाथाय पूजा धायके हल । पूजा सिधय्का सिधा दान गाक्क हे विया हल । वस, तीसः, जाकी, वजी, इत्यादि मदु धयागुला छुं हे मदु । सा छम्ह नं दान विया हःगु जुया चवन । छेँ बज्येम्हसिया “आ तिनी दतका” धका ख्वा चकंका चवन ।

छन्हु बन्ही चिना तम्ह सां सौखी फाना तःगुली मणि छगो नं फाना तःगु जुया चवन । सुथे सा गोठे स्ववंले ब्राम्ह्या गजब जुया थःगु अहो भाग्य धका मती तया व

वांलाक नके त्वके याना लहीना तल । जन्तुतय् नं लुदक नये दु ।

अन थासय् छम्ह जलाखलाथे चवना च्वम्ह दमाई छम्ह नं दया चवन । व दमाईया कलाम्ह धाःसा साप हे चंखे व जालिमह मिसा जुया चवन । इमि भिना वःगुला व मिसाया स्वय् हे मफुत । वरावर व दमाइनी नं चेवा चर्चा याय्त व हे ब्राम्हनीयाथाय् वया खं कुत्त कुला न्यना च्वं वईगु जुया चवन ।

“मखु बज्ये, छपिनिथाय् छु छु दुथे ?” दमाइनी नं न्यनिगु ।

मूर्ख मिसातय्गु स्वभाव नं खः, भातम्ह छगु कोठा-यागु ताःचा मव्यगुलिं व कलाम्हसिया नुःग मू ।

“खः धया, मेगु दक्को कोठयागु ताःचा व्य, व कोठया ताःचा वाज्यां गवलें

मणि कया बांलाक कोठाय यंका सुचुका तल । व कोठयागु ताचा वं सुयातं मव्यू । व मणि धाःसा लक्षणं युक्त जुया च्वंगुलिं इमिला न्हियान्हिथं हे जियावल । नय त्वनेगु भरीपूर्ण जुया छुं छता नं मदु धाय म्वाल । वया भिना वःगु वया दाजुपिनि खास याना ईमि कला कलापिनि सह याये मजिया नुगः मुया वल ।

व ब्राम्हतं छम्ह छुंचा हया दुकटी तया विल । भौचा छम्ह जाथू कोठा पाः तयातल । अथे हे खिचा छम्ह कुने छ्यली पाःतया तयेगु याना इपिं स्वम्ह जन्तुयात नं

हे मव्यू, छाय् थें, अन छु दुथें जिनं मस्यु” धका ब्राम्हनी नं लिसः विल ।

“मखु बज्ये, मखंक ताःचा कया स्वरे । बज्येयातला बाज्यां उलि हे पत्याः मया ख ला?” दमाइनी नं चुकूः तात । धात्थें छन्हु ब कोठयागु ताःचा तीजक खुया कया चाय्का स्वःवले मणि छगो थिना च्वंगु खना तुरून्त व मणि थम्हं कया तालंतुं गोया तल ।

“का स्व भाउजु । थव मणि छगो व कोठाय् दुगु हे जित मधा, गुजोम्ह बाज्या जुइ ।” कलाम्हं दमाइनी यात धाल ।

आ छु मानि मूर्ख ब्रम्हनी यात धों
लायत व दमाइनीया
थाकुगु मखुत ।

“विया विज्याहुं आम मणि छकः
जिमी दमाइ यात
(भातम्ह) छको क्येना ह्य ।”

“का । वरू याकनं ही” ब्राम्हनी
नं धया व मणि विया छ्वत ।

उखें गनं व मणि लित हई ?
दमाइतसें मणि ज्वना तुरून्त हे मेथाय विस्सुं
वना बिल । निन्हु प्यन्हुला व ब्राम्हनी नं श्व
घटना जूगु नापं भातयात मकं । इमिला
भन भन स्यना वल, नय् मखन, दुःख
दरिद्रं सतय् यात ।

“श्व मणि जकं छुं जुलला” धकः
ब्राम्हया कोठाय् ताः चायका स्ववले मणिला
मदया चवन । अले तिनी व मिसां दमाइनी
नं मणि यंकुगु खं तछ्याना कन । काचा
काचां व स्व वंबले दमाइतला माःथाय् विस्सुं
वना चवने धुंकल ।

का जिलला ? थुखे खिचा, भौचा,
छुं तय् नं नय पित्याना सने हे मफया वइन ।

“स्व, भ्नीत बाज्यां गुलि माया याना
नका तःगु । आ भिसं वैगु नीमक नयागुला
पुले हे मा । नु, भ्नी स्वम्हं वना व मणि
माला ह्ये” धका व खिचा, भौचा व छुंतय
सल्लाह यात ।

खिचायाके नत्वनेगु शक्ति अपूर्व
दु । व खिचां नत्वना नत्वना व मणि यंकुगु
लं लिसे व दमाइत च्वना च्वंथाय् श्यंका
बिल । अनंलि छुंया धमाधम प्वा म्हुतुम्हया
मणि तया तःगु कोठाय वने जीक होखना
यंकाविल । दुने वना इमिसं स्वःवलेला मणि
गनं खने मदु । व दमाइ न कमम्ह मखु ।
मेथाय् तलकीं खुया यंकी धका छनेत थःगु
म्हुतुई दुने मणि तया छनिम्ह जुया चवन ।
श्व इमिसं नत्वना सिकल खनि ।

“आ, अथे मखु, छुं थगु न्हयपं
तीजक लिखत वना दमाइया न्हयः सः वयेक
छना च्वनिवले वैगु न्हाय प्वाले न्हयपं च्वकां
गोत्तु गोला व्यु । वं हाच्छि धका हाछिका
तयेव मणि ल्होया महई मखु ।” इमि सल्लाह
जुल । धाःथे तुं छुंचा नं छत्ति हे मचायक
थगु न्हयपंचोका छना च्वंम्ह दमाइयागु न्हासे
दुछोया खुव गोला विल ।

“हाच्छि” धका हाच्छिका तथा ह्यवं
मणि छ्वाराक्क म्हुतुं विस्सुं वन । खिचां
मणि तप्य ज्वना अनं कुलेलम जुईक स्वम्हं
विस्सुं वन ।

लयं ववं ववं छथाय् खुसिचा
तरेयाना वंबले मणि कुतुं वना बिल । व
मणि कुतुं वनेवं खुसी च्वंम्ह न्यां नुनाः
प्वाथय छेत । हाकनं खिचां लखय् द्वाहां
वना मणि नुना व्युम्ह न्या यात ज्वना ह्या

छथाय् यंका न्याया प्वा होखना च्वंबले गनं
गनंईमा छम्ह वया व न्या ज्वना बिस्सुं वन ।

“का, मखुथे जुल । छ्याय् ।”
धका सकलें हाल । “बल्ल गुजागु दुःख
कष्ट याना मणि ह्यां चण्डाल इमां दया
यंकल ।”

थुगु बखते छुंचां बुद्धि पिकाल ।
“स्व । जिं धाय् । छिपि सकलें
मा मा थासे वना सुला च्वं हुं । जि सीम्ह थें
याना चत्ता वाना च्वना च्वने । व इमाया
सीम्ह छुं नं दया यंके धका बय् जुइवं हे छिपि
वना वैत स्याना व्यु” धका छुं खं स्यन ।

धाथें इमाया श्व सीम्ह छुं नं नय्
यंके धका दाय् बय् जक जूत खिचा व भौ
नं भ्रमटे याना तुरन्त हे स्याना बिल । अले
व मणि लिक्कया स्वम्ह मिले जुया थःम्ह
मालिक ब्राम्हया थाय् न्हयःने तया बिल ।

“का, बाज्या गुजोगु परिश्रम याना
जिमिसं हाकनं तने धुंकुगु मणि लुईका ह्या ।
आ खुन्हु बांलाक तथा तै विज्याहुं” धका
मालिकम्ह सित धाल । अनंलि इमि स्वय्
जिया वल । न्हापा थें अन्न वस्त्रनं परिपूर्ण
जुया आनन्दं नया चवन । खिचा, भौचा व
छुं चित नं भन न्हापा स्वया नं अप्पो मानय्
याना नके त्वंके याना तल ।

उलिचिया बाखं थुलि ।

(नेपाया पुलां बाखं पाखं)

इगाप

खवप नगरपालिका पाखं पिथाड च्वंगु स्वप पौ बः छि पौ खय् बांलागु च्वसु
त बियो ग्वाहाली याड दिसँ । उगु रचनाया ल्य ज्या याड पारिश्रमिक बियगु
खाँ खवप नगरपालिकाया २०७७ श्रावण २६ गते च्वंगु बैठकं
कवः छ्यूगु खाँ ब्याक च्वडा ।

सम्पादक
खवप पौ

जि खनागु साँस्कृतिक अस्तित्वया बलात्कार स्वस्व दना वयाम्ह जि

- कवि पूर्ण वैद्य

म्हिंग जिं पुयागु जिगु सिँया बाँसुरी
जिगु समाजया अस्तित्व बवल
जिगु समाजया इतिहास बवल
जिगु पूखाया हिचति बवल
थौं गथे गथे मसिउ जित
जि पुयागु जिगु हे सिँया बाँसुरी
हव मदुगु सिंया कट्टि थें जक ताल
जि थानागु बाजं न
खौ मदुगु सः थें जक ताल
वहे बाजं
म्हिंग नासः द्यः जुलसा
थौं वहे बाजं
जिगु समाजया लागि घाँडो जुल
उकिला जि हालागु
यायेमते अथे छिमिस धका
थम्हेस्या थगुहे संस्कृतिया बलात्कार धका
तर गव न्यनिम्ह सु
धाइम्ह सु
थुइकिम्ह सु
कनिम्ह सु
जि जक हाला
जि जक खवया
जि जिगु हे अस्तित्व न्ह्यने वें जुया
न्यंकेगु थौं सुइत
कनेगु थौं सुइत
बस जिला समाजया मिखां धु जुम्ह
विरोधी धका तक्मा लाम्ह
उकिला जि ज्या मवम्ह जुल

जि जिगु सामाजिक अस्तित्व तापाम्ह जुल
उकिला जि गन मथ्याम्ह जुल
समाजया न्ह्यने धुलें दंगु
गुलाफ माःया कँ थें जक जुलः
जि जित मागु म्वागु मस्वसे
जि दुहाँ वयागु लुखा क्वसं
जि जब दना वयाः
जि जब विरोधया ध्वाँय् ज्वना वया
जि जब हाला वया
जि जब निरर्थकं जुया वया
जि जब विरोधया मिप्वा ज्वना वया
जि जब सामाजिक ह्युपाःया सःज्वना वया
जिगु सः
जिगु विद्रोहया भावना
थुइकेत न्यनेत
दनिमखु सुन्ह
वइमखु सुन्ह
बस इयाःया लुखा क्वस
सकलस्यौं इ फाना वनि
व लुखाःयात सकलस्यौं प्यँका वनि
सकलस्यौं विरोधीया भ्वं तिका वनि
जि न्ह्याबलें गन खः अनहे
जि न्ह्याबलें गन लातः अनहे
छन्हु त्वइगु न्हूँ निभाःया आशा ज्वंज्वं
गव गबलें त्वइगु ख न्हूगु निभाः धकाः
जि पिया च्वनागु जुल याकचा
क्वथा प्वा नापं च्यागु ख्युं मतया जःस्वस्वं
छन्हुला त्वइला धकाः

स्वप नगरपालिकाया ज्या भवः त

कर्णाली प्रदेश थः हे प्राकृतिक स्रोत साधनया तः मिगु थाय्



नेपाल मजदुर किसान पार्टीया ४९ कगू पार्टी पलिस्था दिं या लसताय दैलेख जिल्लाया आठबिस नगरपालिकाया राकमय विहिवार नेमकिपा आठबिस नगर समितिया ग्वसालय जूगु पार्टी कार्यकर्तापिन्ता राजनीतिक प्रशिक्षण मू पाहाँ नेमकिपाया केन्द्रीय दुजः नपां स्वप नगरपालिकाया प्रमुख सुनिल प्रजापति जूँ बियो दिल । उजु इवल्य् थी थी जिल्लाय् नं पार्टी पलिस्था याय मःगुछाय् धाय्गु विषय नपां भारतीय विस्तारबाद व सामन्तवाद नेपःया तः हांपुं दुश्मन खः धाय्गु विषय प्रशिक्षण बियो वयकलं काडः दिल । नेपाल कम्युनिष्ट आन्दोलनय खानय् दःगु खोटा विचः या खण्डन, रूसी संशोधनबाद सामाजिक साम्राज्यवादय् पतन, पाकिस्तान क्वचादयो बङ्गलादेश दयकगु, व निर्वाचनता छ्यलय्गु विषयत नेमकिपा पलिस्था याय् मःगु या मूमू हुनि खः प्रमुख प्रजापति जुं धायो दिल ।

नेमकिपां प्रतिक्रियावादी स्वयो प्रतिक्रिया वादी संघ संस्था दुनय वाडः ज्या सानय्गु नीति काथं चुनावता छ्यलः जनताया सेवा

याडः वयो च्चंगु खाँ व्याकसे वयकलं एमसीसी, एसपीपी व नागरिकता विधेयक थजगु देशघाती संधी सम्भौताया विरुद्ध पार्टी संसद व सडकय् मदिकक संघर्ष न्ह्याकः यंकेगु खाँ काडः दिल ।

संसदं समाजवाद निः स्वान धाय्गु विचः संशोधनवादी विचः खःधायो दिसे वयकलं समाजवाद ज्या साडः नैपुं ज्यापु ज्यामिता भिं याड्गु राज्यव्यवस्था जूगुलीं नेमकिपां त्याकगु स्वप नगरपालिकाय् समाजवाद उन्मुख ज्या यायां वयो च्चड्गु खाँ प्रमुख प्रजापति जुं काडः दिल ।

वयकलं नेमकिपां जक प्रमुख प्रतिपक्षकाथं संसदय् ज्या साडःवगु खाँ कुल दिसे तीन प्रतिशत श्रेस होल्डया विरुद्ध पार्टी मदिकक संघर्ष याडः वानिगु खाँ कुल दिसे वयकलं कर्णाली प्रदेश थः हे प्राकृतिक स्रोत साधनं तः मिगु थाय खः धायोदिल । नपां भारतीय बिस्तारबादी नीति नेपः देता स्वतन्त्र देश काथं स्वीकार याय्गु मति मरुगु खाँ नं काडः दिल ।

ज्या इवः सं नेक्राविसंघया केन्द्रीय नायो भाजु प्रकाश गुरुड जुं मानव समाज विकासया इतिहास क्यडः दिसे नेमकिपां समाजवादी लौपु ज्वं ज्वं साम्यवादी लौपुइ थ्यंक् वानय्गु दीर्घकालीन तातुना ज्वड हज्याकः च्वंगु खाँ व्याकसे समाजवादी व्यवस्थाय् उत्पादनया साधनत फुक्क सामाजिकीकरण जुड्गु, योग्यता, काथंया ज्या व ज्याकाथंया मःक्व ज्याला वर्गविहीन व शोषण रहित समाज जुड्गु खाँ ब्याक दिल ।

ज्या इवः सं स्वप नगरपालिका वडा नं १ या वडाध्यक्ष श्यामकृष्ण खत्री व नेमकिपा आठवीस नगर समितिया नायो जय बहादुर बडुवालया सभानायो लय् दुजः रत्न कठायत व रमेश कुमार माभी पिसं पार्टी पलिस्थाया उद्देश्य व नेपाया कम्युनिस्ट आन्दोलनय् नेमकिपाया योगदान स्पष्ट याडः द्युगु खः ।

सांस्कृतिक धिंधिंबल्ला न्ह्याकय्गु खायँ महिला भजनकःमिपुं मुंक्ल

माघ १३ गते

स्वप नगरपालिकां दायँ दायँ पतिकं याडः वयोच्वंगु सांस्कृतिक विद्या सम्बन्धी धिंधिं बल्ला याय्गु खायँ नगरया फुक्क वडाया महिला भजन मण्डलया महिलापुत्रः या प्रतिनिधिपुं मुंक्ल स्वप नगरपालिकाया सभा कक्ष सं छलफल यात ।



खुम्बु पासाड ल्हामु गाउँपालिकाया अध्यक्ष ख्वप नगरपालिकाय्

माघ १३ गते

ख्वप नगरपालिकाया कार्यवाहक प्रमुख रजनी जोशी नपां पासाड ल्हामु गाउँपालिका सोलुखुम्बुया अध्यक्ष मिड्मा छिरिं शेर्पा नपांया १८ म्हा सिया पुचः लं ख्वप नगरपालिकाय् भायो नपालाड दिल । कार्यवाहक प्रमुख जोशीजुं ख्वप नगरपालिकां चाय्कः तःगु च्यागू शैक्षिक संस्था पाखं देशां देछिया न्ह्युद्व स्वयो अपः ब्वनामिपिन्ता उच्च शिक्षा ब्वकः वयो च्वंगु खाँ ब्याकसे शिशु स्याहार निसैं स्नात्तकोतर तगिं तक आखः ब्वकः वयो च्वंगु ख्वप नगरपालिका देया छगू जक नगरपालिका खः धायो दिल ।



वयकलं ख्वप नगरपालिकां १०० गू शैथ्याया

ख्वप अस्पताल चाय्कः न्हिं ७०० म्हा स्वयो अपः बिरामी पिनिगु उपचार सेवा याड वगु व नगरया हिगूं तुं वडाय् छैं छैं नर्सिड सेवा नपां नगरपालिकापाखं चाय्क तःगु स्वंगू नगर स्वास्थ्य केन्द्र पाखं स्वास्थ्य सेवा बियो वयो च्वंगु खाँ ब्याकसे छगू छगू वडाय निःशुल्क ब्यायामशाला चाय्क, तयागु खाँ नं काडः दिल ।

ख्वप नगरपालिकां सम्पदा ल्यंकः, म्वाकः तयगु व विकास निर्माणया ज्या त उपभोक्ता समितिपाखं याड वयागु खाँ ब्याकसे जनश्रमदान पाखं दांकः भिंक बल्लाक निर्माण जुयो च्वंगु निर्माण लिपा नं थःगु धायगु भावनां जःगु खाँ कुलदिसे ख्वप नगरपालिकां चाय्क तःगु ब्वनय्कुथि व कलेजय् दाच्छिया स्वंगू करोड तका स्वयो अप्वया छात्रवृत्तियो वयो च्वंगु नपां इतिहास, भूगोल राजनीति शास्त्र, संस्कृति व नेपाल भाषा ब्वनिपुं न्ह्याम्हा हे नगर दुनयया ब्वनामिपिन्ता पिएच.डि तक छात्रवृत्ति नपां नगरबासी ब्वनामिपिन्ता डगू लाख तकया शैक्षिक ऋण काथं वियो वयो च्वंगु खाँ काडः दिल ।

ज्या इवः सं अध्यक्ष शेर्पा खुम्बु पासाड ल्हामु गाउँपालिका

पर्यटनया भरय् च्वनय् मःगु खाँ ब्याकसे ख्वप नगरपालिका अपलं लागाय् ब्वस्यलागु जूगुलिं थानानं सय्कः गाउँपालिकाय् लागू याय् फैगु खाँ नं काडः दिल । वयकलं खुम्बु पासाड गाउँपालिका व ख्वप नगरपालिका पर्यटन लागाय् उथिंयंगुलिं नेगू पालिकाया दथवी स्वापु तयो नपां समन्वयया ज्या नपां विचः व अनुभव कालबिल याय् खांगुलिं लयता प्वकः दिल ।

ज्या इवः सं खुम्बु पासाडल्हामु गाउँपालिकाया उपाध्यक्ष श्री टासी ल्हामु शेर्पा, ख्वप नगरपालिका ९ या वडाध्यक्ष रविन्द्र ज्याख्व व ५या वडाध्यक्ष योगेन्द्र मान बिजुकुछैं, प्रमुख प्रशासकीय अधिकृत कृष्णा गिरी, खुम्बु पासाड ल्हामु गा.पा. या प्रमुख प्रशासकीय अधिकृत मोहन प्रसाद चापागाईं पुं उपस्थित जुयो द्यूगु खः ।

नपालायगु ज्या इवः सं कार्यवाहक प्रमुख जोशी जुं अध्यक्ष शेर्पाता ख्वपया लोकं हवागु म्हवय्खा इयो व ख्वप नगरपालिकाया पिथनात उपहारकाथं लः ल्हाडः दिलसा वनं लिपा उगु पुचलं तः माही व लाय्कुलि भायो अवलोकन याडः द्यूगु खः ।

नेमकिपा समाजवाद निःस्वानय्ता संघर्ष याड च्वंगुपार्टी

माघ १३ गते

नेपाल मजदुर किसान पार्टी दैलेख जिल्ला समितिया गवसालय् शुक्रवार जूगु प्रशिक्षण ज्या इवः सं नेमकिपाया केन्द्रीय दुजः नपां ख्वप नगरपालिकाया प्रमुख सुनिल प्रजापति जुं सशस्त्र संघर्ष जक समाजय् ह्यूपा वैगु खाँ ब्याकसे नेमकिपा समाजवाद निःस्वानय्ता संघर्ष याडः च्वंगु दः धायो दिल । जनताया राजनीतिक चेतनास्तर थाकाय मफूतलय इमानदार नेतात चुनावय् त्याकय् मफैगु खाँ ब्याकसे वयकलं नेमकिपा वैधानिक काथं हे प्रमुख प्रतिपक्ष च्वनिगु खाँ नं ब्याकः दिल ।

समाजवादी व्यवस्थाखय् जक ज्या साडः नैपुं वर्गया जनताता भिं जुइगु खाँ काडः दिसे वयकलं ख्वप नगरपालिकां धेबा मदयो च्वय थ्यंकः आखः ब्वनय् मखाना धाय् म्वाय्कः ख्वप नगरपालिका दुनयया ब्वनामिपिन्ता शैक्षिक ऋण वियो वयो च्वंगु नपां दांकः बांलाक शिक्षा वियो वयो च्वंगु खाँ नं ब्याकः दिल ।

ख्वप नगरपालिकां पारदर्शी व आर्थिक अनुशासनय च्वडः ज्या साडः च्वंगु नपां ह्यूपा हयता क्रान्तिकारीपुं लिचिलय मज्यूगु खाँ नं वयकलं काडः दिल ।

नेमकिपा दैलेखया नायो भाजु जग्यबहादुर शाही जुं चुनाव

त्याकय्ता जक गठबन्धन यागु सरकारं जनताता भिं याइमखु धायोदिल ।

अथेहे नेमकिपा जिल्लाया दुजःनिरक बहादुर शाही ल्यासे ल्याम्हों पुं विदेशय् वाडः च्वंगुली चिन्ता कायो दिलसा मेम्हा दुजः केशोन्द्र प्रसाद कार्की शासक दलया नेतात जनताया सेवा स्वयो दलगत व व्यक्तिगत भिं जुइगु ज्याखय् जुयो च्वंगु खाँ काडः दिल ।

ज्या इवःसं नेक्राविसंघया केन्द्रीय नायो प्रकाश गुरुड, लक्ष्मी कुमारविक, कुमारी रुमा गुरुड, श्याम कृष्ण खत्री व मदन कुमार भण्डारी पिसं नं पार्टीया भूमिका काडः दिल ।



समाजवादी व्यवस्था ज्यासाड नैगु वर्गया भिं याय्ता हज्याइ



माघ १४ गते

समाजवादी व्यवस्थाखय् जक ज्यासाडः नैगु वर्गया जीवन चकानी । समाजवादी व्यवस्था ज्यासाडः नैगु वर्गया भियाय्ता हज्याई ।

थुगु खाँ नेपाल मजदुर किसान पार्टीया केन्द्रीय दुजः नपां ख्वप नगरपालिकाया प्रमुख सुनिल प्रजापति जुं दैलेखया रेडियो समावेशी एफएम.ता अन्तर्वार्ताखय धायो द्यगु खः ।

रेडियो प्रस्तोता सुरेन्द्र शाही नपां जुगु खँल्हा बल्हाखय् वयकलं धायोदिल- प्रदेश व संघ नीति निर्माण याइगु थाय् दक नेपःया संविधानय् बांलाक च्वयो तःगु दः । स्थानीय तहता स्वायत्तता व स्वतन्त्र जुयो ज्या मसांकय्ता सरकारं हे कंकु क्यंकः तःगु दः उगु ज्या संविधानया मति व भावनाया अखः खः ।

राष्ट्रिय स्वतन्त्र पार्टीया रवि लामिछानेया नागरिकताया विषयलय न्यंगु न्ह्यसः या लिसः बियो दिसे 'नागरिकता ऐन २०६३ सं सुनं नेपाली नागरिकं विदेशी नागरिकता कःसा नेपः या नागाकिता स्वतः खारेज जुइगु व्यवस्था दः गुलिं विदेशी नागरिकता काय् धुपुं मनूत निर्वाचनय ब्वति कः बलय् छानविन मयासैं उम्मेदवार सदर यागु निर्वाचन आयोगया कमजोरी खः धायोदिल ।

प्रधानमन्त्रीता विश्वासया मत ब्यम्हा नेकांता सभामुखं

प्रमुख प्रतिपक्ष क्वः छ्यगु खाँय न्यंगु न्ह्यसः या लिसः बियोदिसे वयकलं संविधानया प्रावधानया अखः सभामुखं नेपाली कांग्रेसता प्रमुख प्रतिपक्ष क्वः छ्यगु सभामुखं गलत ज्या यागु खाँ ब्याकसे थमनं द्यकागु कानून थमनं हे पालना मयागु कुंखियमःगु ज्या खः धायो दिल । उकीं नेपालय पश्चिमेली प्रजातन्त्र असफल जुयो चिनियाँ शैलीया प्रजातन्त्र हज्याड वयो च्वंगु खाँ नं वयकलं काडः दिल ।

ख्वप नगरपालिकाया ज्या इवः या बारे न्यंगु न्ह्यसः या लिसः बियो दिसे वयकलं ख्वप नगरपालिकां शिक्षा, स्वास्थ्य, सम्पदा ल्यंकः म्वाकः तयगु ज्या नपां सुचुकुचुता हदाय् तयो जनताता हदाय् तयो ज्या साडः च्वंगु विदेशीया भरय् आत्मनिर्भर जुय मफैगुलिं आत्मनिर्भर जुयगु कुतः यायां च्यागू शैक्षिक संस्था व कलेजत चाय्कः दांकः भिंक शिक्षा बियो वयो च्वंगु खाँ कुल दिसे जनप्रतिनिधिपुं इमानदार जूसा थः थः गु थाय् हछ्याय् फैगु दसु ख्वप नगरपालिका खः धायोदिल ।

पञ्चायतया विरुद्धय् भेरी कर्णालीया जनताता राजनीतिक रुपं ग्वाकः हछ्याडः च्वंगु खाँ कुल दिसे वयकलं अः नं थुगु थासय् बांलाकः अनुशासित जुयो संगठन हज्याक च्वंगु दः धायोदिसे प्रमुख प्रजापति जुं सरकारय् वानय्गु मतिं मखुसैं लेनिनवादी नीति काथं चुनावता छ्यलः देश जनताया पक्ष सदन व सडकय संघर्ष याड, च्वंगु खाँ काडः दिल ।

सशस्त्र संघर्ष जक समाजय ह्युपा वइगु नेमकिपाया सिद्धान्त कुल दिसे संघ, प्रदेश व स्थानीय तहलय् छगू देशभक्त पार्टी काथं सिद्धान्तया राजनीति याडः वयो च्वंगु छगू स्थल्लागु पार्टी खः धायोदिल । नेमकिपा देशभक्त व अन्तर्राष्ट्रवादी पार्टी खः धायोदिसे वयकलं शासक दलया जनविरोधी ज्याया सशक्त विरोध याडः जनताता सचेत यायां वयो च्वंगु खाँ ब्याकसे इमानदार जुयो देश व जनताया पक्ष राजनीति याय् मःगु, राजनीति जुइपुं ब्वनामिपुं मे पुं स्वयो फुकक लागाय् हदाय लाइगु नं वयकलं धायो दिल ।

देया ल्यासे ल्याम्होया शक्तिता देश्य हे छयलय् मः

माघ १४ गते

नेमकिपाया ४९ कगू पार्टी पलिस्था दिवसया लसताय अछामया तुर्माखाँदया भैरवस्थानय् जुगु प्रशिक्षण ज्या इवः सं नेमकिपाया केन्द्रीय दुजः सुनिल प्रजापति जुं अः याय्गु पुँजीवादी व्यवस्थाय् गरिबत भन भन क्वः हःथें जुयो वानिगु तः म्पुं भन भन तः ग्वारा जुयो वैगुलिं गरिब जनतात खाँ थुइकः छप्पा छधि जुयमः धायो नेमकिपा हज्याड च्वंगु खः धायोदिसे पुँजीवादया विरुद्धय ज्या साडः नैपुं ज्यापु ज्यामित छप्पा जुयो हज्याय मफू तलय् देश्य समाजवाद वैमखु धायो दिल । वयकलं देया ल्यासे ल्याम्होपिन्ता विदेश्य छोयां रेमिट्यान्सया भरय् देश चल्य याय्गु शासक दलया गलत सोच खः धायोदिसे थजगु सोच व नीतिया विरोध याय्मः ल्यासेल्याम्होपिन्ता भीगु देश्य हे ज्या बियमः धायोदिल ।

देया शासक दलत सत्ताय्जक प्यपुड च्वनय्गु राजनीति याडः च्वंगु खाँ कुखिड दिसे प्रमुख प्रजापति जुं भिपुं राजनीतिज्ञपिसं देयाता च्वय् तयो ज्या सानि, नेमकिपाता सत्ता मोह मरु बरु दुर्गम जिल्लाया क्वत्यय्क च्वपुं वर्गता राजनीतिक रूपं ग्वाकय्गु ज्याख्य जुयो च्वंगु खाँ ब्याकः दिल ।

शिक्षा मदयकः हज्याय् थाकुइगुलि थाकु मचःसे शिक्षाता हदाय् तयो पार्टी हज्याडः च्वंगु खाँ काडः दिल ।

ज्या इवः सं अछाम नेमकिपाया नायो भाजू भक्तबहादुर शाही जुं देशघाती सन्धी सम्भौताया विरुद्धय सदन व सडकय् मदिकक संघर्षयाडः च्वंगु खाँ काडः दिसे शिक्षा सेवामुखी जुयमः धायो दिल ।



ज्या इवः सं नेक्राविसंघया केन्द्रीय नायो प्रकाश गुरुडं नेमकिपां विद्यालय शिक्षा निःशुल्क व अनिवार्य जुयमः व च्वयथ्यंकया फुक्क शिक्षा निःशुल्क जुयमःगु खाँ हछ्याडः च्वंगु नेक्राविसंघ नं निःशुल्क व वैज्ञानिक शिक्षाया लागिं ल्वाडः च्वंगु खाँ काडः दिल । शिक्षाया लागाय् नवउदारवादं याडः विदेशी विश्वविद्यालयया सम्बन्धनय् थाना थी थी पहः या कलेजत चायकसेलिं शिक्षाख्य अनेक विकृति वगु खाँ काडः दिसे वयकलं त्रि.वि.या बेथितिं नं ब्वनामिपिनिगु भविष्य कन्हे छु जुई धाय् थाकयो च्वंगु खाँ ब्वयो दिल ।

ज्या इवः सं ख्वप नगरपालिका वडा नं. १ या वडाध्यक्ष श्याम कृष्ण खत्री जुं ख्वप नगरपालिकां यूवा विद्यार्थी लक्षित थी थी ज्या इवः त याड च्वंगु खाँ काडः दिल ।

मेयरकप तेक्वान्दो धिधिं बल्ला सं ख्वप नगरपालिका ल्यायां ल्युं

माघ १४ गते



जैशिवेल युथ क्लवया ग्वसालय जूगु न्हिल्या २०७९ माघ १२ गते निसें १४ गते तक जूगु बागमती प्रदेश स्तरीय स्वकगू जुनियर आमन्त्रण मेयरकप तेक्वान्दोया धिं धिं बल्लासं ख्वप नगरपालिकां खुगू पदक त्याकः टीमया ल्यु या ल्यु लाकय्ता तः लागु दः ।

धिं धिं बल्ला सं (महिला) मिसा मचात पाख्य २३-२६ के.जी तौल समूहख्य जेनी जोशी व ३२-३५ के.जि. तौल समूह सं दिया लाखाजु पिसं न्हाप, २९-३२ के. जि. तौल समूहख्य रिद्धि ग्वाछां ल्यु या ल्यु लाकगु खः सा मिजं मचा पिनि पाख्य २५-२८ के.जि. तौल समूहख्य शोबराज तामाड, ३४-३८ के.जि. तौल समूह ख्य रिको ह्योम्बा व ३८-४२ के.जि तौल समूह ख्य नवीन सेन्चुरी ल्यु या ल्यु लाकगु खः ।

धिधिं बल्लाख्य ख्वप नगरपालिका पाखं मिसामस्त हिम्हा व मिजं मस्त हिम्हा याडः मुक्कं नीम्हासिनं ब्यति कः गु खः । ख्वप नगरपालिकाया टीम प्रशिक्षक अनिश खयरगोली व टीम व्यवस्थापक बलराम न्हिसुतुं भाला कुबियो द्युगु खः ।

तुमचो, दुगुरे चोखा आवास क्षेत्रे छलफल

माघ १५ गते

खप नगरपालिकापाखं न्ह्याकगु तुमचो दुगुरे चोखा आवास क्षेत्र सडक, चोक व छँ या ना वैज्ञानिक ठेगाना प्रणाली लागू याय्गु खायँ स्वापु दः पुं मनूत मुंक छलफल यात ।

स्यंक ब्यूगुलिं गना चवनय् धाय्म्वायक काथं छिंगु थाय् दःगु खॉ काडः दिसे नेमकिपा पलिस्थादिया खॉ कुलदिसे पार्टीया न्ह्यलुवा पिसं इमानदारिता, लिपाथ्यंकया बिच याडः यागु ज्या व देशभक्तिपूर्ण



आन्दोलनं याडः कार्यकर्ता कपः धस्वाक जुय फःगु खॉ काडः दिसे वयकलं ज्या साड नैपुं जनताया निस्वार्थ सेवा वाहेक नेमकिपाया मेगु स्वार्थ मरू धायो दिसे न्हुंगु पुस्ताता पार्टीया गौरवपूर्ण इतिहास व संघर्षया खॉ कानय मःधायो दिल ।

ज्या इवः सं वडा नं ९ या वडाध्यक्ष रबिन्द्र ज्याख्व जुं स्वापु दःपुं न्ह्यलुवा पुं नपां तःक हे छलफल याडः अः याता नमूना काथं तुमचो दुगुरे चोखा आवास क्षेत्रे वैज्ञानिक ठेगाना प्रणाली तय् तांगु खः धायोदिल । प्रणाली लागू याय्गु इवल्य छुं ल्हवनय् मःगु थाय दः सा हकनं छलफल याय फः गु खॉ व्याकसे वयकलं कलेजया पुचः ता सुभाय देछायो दिल ।

उपभोक्ता समितिया नायो बिष्णु प्रसाद

खप नगरपालिका वडा नं ९ या ग्वसालय् जूगु उगु ज्या इवःसं खप इन्जिनियरिड कलेज व खप कलेज अफ इन्जिनियरिड्या, प्रविधिक पिसं उगु आवास क्षेत्रता डाब्ब थयो स्थानीय जनतात नपां खॉ ब्याकः पुलांगु नां हे तःगु दः सा लॉ व छँया ल्या (नम्बरिडग) धःसा मेट्रिक प्रणाली या लिधँसाय यागु खः । थथेयाः सा न्ह्याम्हानं न्हुपुं मनूतयसं नं अःपुक हे छँया ठेगाना लुइके अःपुइगु नपां लिपा दानिगु छँ याय् नं ल्या तयो तःसा समस्या मजुइगु खॉ व्याक दिल ।

छलफल ज्या इवः सं पूर्व वडाध्यक्ष नपां नेपाल मजदुर किसान पार्टी भ.न.पा. ९ वडा समितिया नायो कृष्ण भक्त लवजुं नगरपालिकां जनताया इच्छा काथं हे आवास योजना न्ह्याकगु अलय जनताया इच्छा काथं हे व थाय्या विकास निर्माण हछ्याड च्वंगु दः धायोदिल वयकलं नगरपालिकां इलय हे व्यवस्थित आवास योजना न्ह्याकगुलिं २०७२ सालया तः भवखाचां पुलांगु बस्ती अपलं

दुमरुं नं न्वचुतयो द्यूगु उगु ज्या इवः सं कलेजया प्राविधिक पुं आ. युरेका राजवंशी व इं. सशिन्द्र प्रजापतिपिसं ठेगाना प्रणाली छ्यलय्गु खायँ अः तक जुय धुंगु ज्याया प्रस्तुति क्यडः दिलसा स्थानीय नारायण प्रसाद कुसी, जगनाथ प्रजापति, विश्वराम प्रजापति पिसं नं सल्लाह बियोद्यूगु खः ।

- ◆ खप नगरपालिकाया प्रमुख सुनिल प्रजापति दैलेखया दुल्लुइ च्वंगु हँशज्वाला देगः आना हे भायो स्वयो दिल ।
- ◆ अथेहे वयकलं जुम्लाया रेडियो खुल्ला आकास एफ.एम. सं खँल्हाबल्हा याडः दिल ।
- ◆ नेमकिपा पलिस्था दियालसताय दैलेखया आठबीस नगरपालिका बडानं १ सातलासं पार्टी कार्यकर्ता नपालाडः दिल । उब्ले हे आनाया नगरपालिकाया श्री लक्ष्मी मा.वि व स्वास्थ्यचौकी नं भायो स्वयो दिल । (२०७९ माघ १३ गते)

**खप नगरपालिकाता न्ह्याबले सफा,
सुघर तय्गु सकल नगरवासीतय्गु कर्तव्य खः ।**

नेपाली कांग्रेसता प्रतिपक्ष दल क्वःछ्युगु कुंखियमःगु ज्या

माघ १५ गते

नेमकिपाया पलिस्था दिंया लसताय आइतबार दैलेखया नेपाली कांग्रेसता प्रमुख प्रतिपक्ष दलदक क्वःछियगु कुंखिय मःगु व



लज्यामरुगु ज्या खः वयकलं धायोदिल । राजनीतिसं नैतिकता दकलय् च्वयया चीज खः धायो दिसे कम्युनिष्ट कार्यकर्तात ब्यक्तिवादी सोच व बिचः लं तापाकक च्वडः सामुहिक भिं जुइगु ज्याखय् हज्याय् मः धायो दिल ।

- ज्या इवः सं नेक्राविसंघया केन्द्रीय नायो प्रकाश गुरुडं पुँजीवादी ब्यवस्था हाँगःलिसे ल्यं थानय्मफूतलय् ज्यासाड नैपुं वर्गया भिं मजुइगु खाँ ब्याकसे सरकारता खबरदारी यायगु ज्या देश भक्त नेपः मि पिनिगु खः धायो दिल ।

अथेहे नेमकिपाया केन्द्रीय दुज नर्मा गुरुडं पार्टी कार्यकर्ता पिसं थः काय म्हायपिन्ता राजनीतिक ज्या इवखय् ह्यताछवासा बिय मःगु, पार्टीया योगदानया खाँ न्हुंग पुस्ताता कानय मः गु, अन्तरक्रिया व गोष्ठी याडः

गुराँस गा.पा.या च्वयया दुंगेश्वर बजारय् जूगु प्रशिक्षण ज्या इवःसं मू पाहाँ नेपाल मजदुर किसान पार्टीया केन्द्रीय दुजः नपां ख्वप नगरपालिकाया प्रमुख सुनिल प्रजापति जुं पार्टीया आजु पुवांकय्ता भ्याभाति हे थाकु मचः सें हज्याड च्वंपुं न्हयलुवापिन्ता हनाबना यासे भेरी व कर्णाली अञ्चलय् पञ्चायतया विरुद्ध पुसा ह्वलयगु ज्या राजनैतिक दल नेपाल मजदुर किसान पार्टी यागु खः धायोदिल ।

नेमकिपाता हाँगःलिसे हे ल्यं थानयता यक्व दा हाँ निसें हे शासक दलत लीड मलाक जूगु दसुत ब्वयो दिसे वयकलं नेमकिपां जनताता राजनैतिक रुपं ग्वाकः हछ्याय्ता खुल्ला विश्व विद्यालय काथं निर्वाचनता छ्यलः वयो च्वंगु खाँ ब्याकसे मिडिया गैर सरकारी संस्था व अन्तरराष्ट्रिय गैर सरकारी संस्थाया नामय् साम्राज्यावादी व विस्तारवादी तयसं थी थी देशय् थःपुं दलालत ब्वलांकय्ता अरबौं तका खर्च याइगु खाँ ब्याकसे वयकलं चुनावय् त्याकां जक देशय् ह्युपा वइगु सम्भव मरु धायो दिल ।

सिक्किम भारतय् दुस्वक नेपः देता नं भारतय् दुसुकः छ्वयगु थी थी चलखेल जुयो च्वंगु खाँ ब्याकसे अः संसद गुन्ही पुन्हीया गाईजात्रा थें जुय धुंकगु खाँ काडः दिल ।

सरकारे वानिपुं व सरकारता समर्थन याइपुं दल छुं काथं हे प्रमुख प्रतिपक्ष जुय मफैगु कानुनय प्रष्ट च्वयो तः गु दया नं सभामुखं अप्रजातान्त्रिक काथं

छप्पा छधियाय्मः धायो दिल ।

- वयकलं तालाबन्दी, बन्द, हडताल याडः नेपः या विश्व विद्यालय या विश्वास म्हवें जुयो वांगु खाँ ब्याकसे पार्टी कार्यकर्ता पिसं पार्टीया पिथनात त्वः मफिइक ब्वनय्मः धायोदिल ।

नेमकिपा दैलेख जिल्ला तयारी सम्मेलनया कजि जगत ओलिया सभानायोलय् जूगु उगु ज्या इवः सं ख्वप न.पा. वडा नं. १ या वडाध्यक्ष श्यामकृष्ण खत्री, नेमकिपा दैलेखया रत्न बहादुर श्रेष्ठ, गुरुड नं न्वचु तयो द्युग खः ।



उगु इलय दैलेख दुल्लइ जूगु साफू ब्वज्या

थी थी नगरपालिकाया प्रमुख पुं ख्वप नगरपालिकाया प्रमुख नपां

माघ १६ गते

ख्वप नगरपालिकाया प्रमुख सुनिल प्रजापति व कर्णाली व लुम्बिनी प्रदेशया थी थी नगरपालिकाया नगर प्रमुख जुपुं नपां नपालाड अनुभव कालबिल याडः दिल ।

थुगु इवलय प्रमुख प्रजापति जुं सुर्खेतया भेरी गंगा नगरपालिकाया प्रमुख यज्ञप्रसाद ढकाल, सुर्खेत, गुर्वाकोट नगरपालिकाया प्रमुख हस्त पुन, बाँके कोहलपुर नगरपालिकाया प्रमुख पूर्ण प्रसाद आचार्य, सल्यान जिल्ला शारदा नगरपालिकाया प्रमुख प्रकाश भण्डारी व बर्दिया जिल्ला बाँसगढी नगरपालिकाया प्रमुख खड्ग बहादुर खड्का पुं नपां बिस्कं बिस्कं नपालाडः दिसे ख्वप नगरपालिकाया बः चा हाकलं म्हासिइका पिब्बयों दिसे ख्वप देता पर्यटकीय गन्तव्यस्थल नपां ज्ञान विज्ञानया मू थाय् काथं ह्छ्याय्ता ज्यासाड च्वडागु खाँ ब्याकसे ख्वप नगरपालिकां ख्वप विश्व विद्यालय न्ह्याकेगु कुतः याडः च्वडागु नपां शैक्षिक ऋण, छात्रवृत्ति, सम्पदा ल्हवनय-कानय व दानयगु ज्या व थी थी ज्याया खाँत ब्वयो दिल ।

नपालायगु इवलय भेरीगंगा नगरपालिकाया प्रमुख यज्ञ प्रसाद ढकालं कर्णाली प्रदेशमा मूलुखा थें जःगु भेरी गंगा नगरपालिका हिंस्वंगू वडाय ब्वथल तःगु, २०७८ सालया जनगणनाया ल्याखं मुक्कं ४८ हजार पाँच सय दःगु थुकिया ब्या (क्षेत्रफल) सुर्खेतया डागू नगरपालिका मध्ये थव स्वंगूगु तःक्वगु नगरपालिका खः धायोदिसे थुगुथासय् बेमौसमी तरकारी खेती, दुरु उद्योग, व च्वलेचा लहियगु ज्या याडः नयो च्वंगु खाँ ब्याकसे सकल जात जातिया मंकःगु थाय् काथं बसोबास याडः च्वंगु थुगु थासय् विशेष याड क्षेत्री, ब्राम्हण, दलित व मगर जातिया बसोबास दः धायो दिल । ख्वप नगरपालिकां याडः च्वंगु शैक्षिक उपलब्धीता च्व छायो दिसे उगु नगरपालिकां नं लच्छीया छक सचुकुचु ज्या इवः न्ह्याक च्वडागु खाँ ब्याक दिल ।



अथेहे सुर्खेतया गुर्भाकोट नगरपालिकाया प्रमुख जु नपालायगु इवलय प्रमुख पुन जुं कर्णाली प्रदेश सुर्खेत जिल्ला निसें पूर्वपाखय् च्वंगु थुगु नगरपालिकाता सहरकाथं ह्छ्याय्गु योजना दःगु थव थासय् ४३ द्वस्वयो अपः जनसंख्या दःगु ब्यापार, उद्योग, पर्यटन व व्यवसायिक कृषिया माध्यमं थानाया जनतात जीवन हाड च्वंगु अलय् म्हवचाजक स्रोत दःसां जनताया सेवा याडः च्वंगु थानाया मुख्य बजार मेहेलकुना खः धायो दिल । नपालायगु इवलय आनाया उप प्रमुख मैना विक व कार्यपालिकाया दुजः पुं नं भःगु खः ।



कोहलपुर नगरपालिकाया पूर्णप्रसाद आचार्य नपालायगु इवलय नेपः या मध्य पश्चिम तराई लागु थुगु नगरपालिका १८४-२६ वर्ग. मि. डाड च्वंगु, बाँके जिल्लाया सदरमुकाम काथं हज्याडः च्वंगु नेपाल गज्जं १० कि.मि. उतर पाखय् च्वंगु कोहलपुर नगरपालिकां नगरप्रहरी या व्यवस्था नं याडः च्वंगु खाँ ब्याकः दिल ।



अथेहे सल्यानया शारदा नगरपालिकाया प्रमुख प्रकाश भण्डारी जुं ख्वप नगरपालिकां याडः च्वंगु असल अभ्यास या खाँ थमनं नं सियागु ख्वप नगरपालिकाया ज्या स्वयता ख्वपय् वयगु योजना दः गु खाँ ब्याक दिल ।

अथेहे कोहलपुरया बाँसगढी नगरपालिकाया प्रमुख खड्ग

सचिवालय स्तंगुगु खप पौ, बःखि पौ(पाक्षिक)

बहादुर खड्का जुं लुम्बिनी प्रदेशया बर्दिया जिल्लाय् लागु थुगु नगरपालिका न्हेंगु खः धायोदिसे उगु नगरपालिका दुनय् ४० गू सामूदायिक व १६ गू निजी याडः ५६ गू ब्वनय् कुथित दःगु थाना



प्रमुख जु नपां खप नगर प्रमुख सुनिल प्रजापति जुं नपालाडः दिल । नपालाय्गु इवलय् प्रमुख प्रजापति जु व नेपालगञ्ज उप महानगरपालिका प्रमुख प्रशान्त बिष्ट जुं थःथःगु अनुभव काल बिल यासे खप नगरपालिकां याडः च्वंगु शिक्षा, स्वास्थ्य सूचकुचुया



बर्दिया राष्ट्रिय निकुञ्ज दःगु थव नगरपालिका ९ गू वडाय् ब्वथल तःगु थयं मथयं ७२ टु जनसंख्या दः धायो दिल । आना हे बाँसगढी नगरपालिकाया प्रमुख प्रशासकीय अधिकृत कमल प्रसाद पौडेल, शिक्षा अधिकृत छत्रबहादुर शाही नं भःगु खः ।

थी थी नगरपालिकाया जनप्रतिनिधि पुं नपा लाय्गु इवलय खप नगरपालिका वडा नं १ या वडाध्यक्ष श्यामकृष्ण खत्री, का. पा. या दुजः रञ्जना त्वाती नं भःगु खः सा खप नगर प्रमुख प्रजापति जुं नपालापुं फुक्क प्रमुख पिन्ता खप नगरपालिकाया पिथना उपहार काथं लः ल्हाडः बियो द्यूगु खः ।

अथेहे माघ १७ गते नेपालगञ्ज उप महानगरपालिकाया

खाँ ब्याकसे धवगिडगु व धवमगिगु फोहर छख्य लिडुकः नेपाली सः दयकः कृषकपिन्ता दांकः बियो च्वडागु खाँ नं काडः दिल ।

अथेहे प्रमुख बिष्ट जुं थुगुसी निसें पूर्वाञ्चल विश्वविद्यालय पाखंया कलेज चाय्कः विविएस व मेगु विषयत न्ह्याकागु, फोहर व्यवस्थापन याडः च्वडागु व आनाया पर्यटकीय स्थलत वागीश्वरी देगः व आनाया लिक्कया थाय् व नेपः या न्हापांगु ग्वायँदःम्हा महाद्योया मूर्ति पलिस्था यागु खाँ ब्याक दिल ।

नपालाय्गु इवलय् नगर प्रमुख प्रजापति जुं खप नगरपालिकाया पिथनात उपहार काथं लः ल्हाडः दिल ।

खप नगरपालिकाया कार्यवाहक प्रमुख रजनी जोशी निरीक्षणय्

माघ १७ गते

खप नगरपालिकाया कार्यवाहक प्रमुख नपां अनुगमन समितिया कजि रजनी जोशीया न्हयलुवाय् नगरपालिकापाखं उपभोक्ता समितिपाखं ज्या सांकः च्वंगु खप नगरपालिका ५ नं वडाया भिन्डोथाय् निसें आदर्शतकया ल्वहँतं सियगु व लाँ ल्हवनय्गु व तरकारी बजारया नितिं पूर्वाधार निर्माण व ७ वडाया छिपा तायँ ल्हँव तं सियगु व घाट ल्हवनय्गु, हनुमानघाट शव दाह गृह थिडक प्रतीक्षालय्(पियगु फल्वा) दानय्गु गयभिन्डो निसें आदर्श तकया लाँयाय् पूर्वपाखय् फः दय्केगु हनुमानघाटया लोकेश्वर देगः दानय्गु योजनात थासय् हे भ्नायो स्वयो दिल ।

अनुगमन पुचलय् वडाध्यक्षपुं उकेश कवां (७), योगेन्द्र मान बिजुक्छें (५), उपेन्द्र सुवाल (४), प्रमुख प्रशासकीय अधिकृत कृष्ण गिरी नं भःगु खः ।

अथेहे माघ १९ गते खप नगरपालिकाया उप प्रमुख रजनी जोशी जुं खप नगरपालिका वडा नं ६ व ९ वडाय् न्ह्याकः च्वंगु



योजनात निरीक्षण नपां खप नगरपालिका पाखं ब्वति काडपुं खो खो या कासामि पिन्ता प्रोत्साहन बियो दिल ।

खप इञ्जिनियरिङ् कलेज २१ दा व खप कलेज अफ इञ्जिनियरिङ् १४ दा क्यन

माघ २० गते

नेपाल मजदुर किसान पार्टीया नायो भाजु नपां वरिष्ठ राजनीतिज्ञ नारायण मान बिजुक्छें (रोहित) जू खप नगरपालिकापाखं चाय्कः तःगु खप इञ्जिनियरिङ् कलेज व खप कलेज अफ इञ्जिनियरिङ्या वार्षिकोत्सवया ज्या इवः शुक्रवार पानसय् मताच्याक उलेज्या याडः दिल ।

ज्या इवः सं मू पाहाँ विजुक्छें जुं थी थी विश्व विद्यालयया बारे अध्ययन याडः छलफल याय मःगु खाँ कुल दिसे छु देशया राजनीति बांलाई व देशया शासन व्यवस्था नं बांलाई धायो दिसे वयकलं शैक्षिक संस्थाय तालाबन्दी तोडफोडे जुडगु घटनात याकय मबियमःगु खाँ नपां प्राध्यापक पिसं ब्वनामिपिन्ता वैचारिक संघर्ष याय्गु खाँ स्यनय् मःगु, विषयगत काथं नं खपया ब्वनामिपुं दकलय् बांलाड, अब्बल जुयमः गुलि बः बियो दिल ।



नायो भाजु बिजुक्छें जुं नेपः देशय् अः पश्चिमेली प्रजातन्त्र तालय् मलाड चीनया प्रजातन्त्र पाखय् वाडः च्वंगु खाँ ब्याकसे संसदय् प्रमुख प्रतिपक्ष थःगु धर्म इमानदारीकाथं छ्यलःच्वंगु मरु । सत्तापक्ष असफल जूसा किचा सरकारं सरकार न्ह्याकय् मः गुलि उकिया लागिं प्रमुख प्रतिपक्ष दल न्ह्याब्लें तयार जुयो च्वनयमः धायोदिल ।

ज्या इवया सभा नायो नपां खप नगरपालिकाया प्रमुख सुनिल प्रजापति जुं उदारीकरणया नामय शिक्षा निजीकरण यासेलिं गरिबया सन्तानत च्वय् थ्यंकया शिक्षा काय्ता तस्कं थाकुयो च्वंगु खाँ ब्याकसे वयकलं शिक्षाया लागि जक देश थ्यं मथ्यं १ खर्ब तका दां पिनय वानिगु ल्याचा पिब्वसे देया फुक्कं कलेज व विश्व विद्यालयत

च्वःजःगु (स्तरीय) जूगु जूसा ब्वनय्ता प्याहाँ वानिपुं ब्वनामिपुं म्हव जू जू वानिगु खाँ काडः दिल ।

वयकलं शिक्षाया दायित्व राज्यं कायमः धाय्गु जिमिगु मान्यता खः धायोदिसे देशय् डांकः निजी शैक्षिक संस्थात न्ह्याकः च्वंगु इलय खप नगरपालिकापाखं चाय्कः तःगु कलेजत हज्याड, वयो च्वंगु सकलसिया निंतिं उपलब्धीपूर्ण खः धायो दिल ।

वागमती प्रदेश सभाया दुजः सुरेन्द्रराज गोसाईं जुं खप नगरपालिकाया कलेजत देयाय् हे तस्कं बांलागु तिसार्थे जुयो च्वंगु खाँ कुल दिसे खप सर्कलया शैक्षिक संस्थात जनताया आशाया केन्द्र काथं पलिस्था जुयो च्वंगु दः धायोदिल ।

वयकलं सिद्धान्त व बिचः मरुगु राजनीतिया छुं हे अर्थ मदैगु खाँ ब्याकसे शासक दल पद व धेबाया चाकलीं इमामरं कायो च्वंगु देश व जनताता भिं मजुडगु ज्या खः धायो दिला । देशघाती सन्धी सम्भौता व अन्यायया विरुद्ध नेमकिपाया संघर्ष न्ह्याडं तुं च्वनिगु खाँ ब्याकः दिल ।

अथेहे खप नगरपालिकाया उपप्रमुख रजनी जोशी जुं इञ्जिनियरिङ्या लागाय तहांगु ह्युपा ह्युगु ज्या खप इञ्जिनियरिङ् कलेजं जूगु खाँ ब्याकसे नगरपालिका पाखं चाय्कः तःगु कलेजं देश व जनताया सेवायाड च्वंगु दः धायोदिल ।

त्रि.वि. अध्ययन संस्थानया डिन प्रा. डा. शशिधर राम जोशी जुं इञ्जिनियरिङ् विषय थः हे अपलं च्व जःगु विषय काथं हज्याड च्वंगु खाँ ब्याकसे इञ्जिनियरिङ् शिक्षां देया विकास नं मथां मथां याडः च्वंगु दः धायोदिल ।

अथेहे पूर्वाञ्चल विश्वविद्यालयया इञ्जिनियरिङ् संकायया डीन प्रा.ई.देवी प्रसाद भट्टराइ जुं समूदायया लिधंसाय् चाय्कः तःगु खप इञ्जिनियरिङ् कलेजं देया लागिं मःपुं जनशक्ति ब्वलांकः च्वंगु खाँ कुलदिसे कलेजया शैक्षिक व भौतिक अवस्था च्वछाय बहजु धायोदिल ।

वहे इवलय् खप इञ्जिनियरिङ् कलेजया प्राचार्य सुजन माक व खप कलेज अफ इञ्जिनियरिङ्या प्राचार्य सुनिल दुवालं कलेजया वार्षिक प्रतिवेदन पिब्वयो दिल । उगु ज्या इवःया लसताय मू पाहाँपिसं नीदा ज्या सां पुं कर्मचारी व प्राध्यापक पिन्ता हनापौ व वार्षिकोत्सवया लसताय जूगु कासाया धिं धिं बल्लासं तः लापुं कासामिपिन्ता मेडल व दसि पौ लः ल्हाडः दिल ।

ख्वप विश्व विद्यालय विधेयक पारित मयापुं शिक्षा विरोधी

माघ २१ गते

ख्वप नगरपालिका पाखं चाय्क तःगु इञ्जिनियरिङ् कलेजया पलिस्थादिं या लसताय जुगु ज्या इवः नेमकिपाया छ्याञ्जे नपां संघीय सांसद प्रेम सुवालया मू पाहाँलय क्वचाल ।



ज्या इवः सं मू पाहाँ सुवाल जुं १९४२ सय् अमेरिका देश लुङ्कगु खः । उगु इलय् ख्वपया भावाचो धवाका दय्कः चवंगु जुल । थुकाथं सभ्यता व संस्कृतिखय् नेपः दे तस्कं तःमि अलय् राणाशासनया १०४ दा, अलय् हिदाया संसदीय ब्यवस्था व स्वीदाया पञ्चायतीकालय् शिक्षा उलि तःलाक हज्याय् मफूत । बहुदल व गणतन्त्रया थुगु स्वीस्वदाखय् नं नेपःमि पिन्ता शिक्षा फुक्कसिनं काय् फौगु काथं अः पुक मब्यू धायो दिल ।

वयकलं सन १७७६ य् अमेरिका बेलायतया उपनिवेशं स्वतन्त्र जुला । अमेरिकी संविधानय् जनतापाखं जनताया लागि सरकार दक च्वता । अः अमेरिकी प्रजातन्त्र व मानव अधिकारया परिभाषा एक धुवीय व थःकतःया विभेदं जः । ताम्रवर्णया अमेरिकी आदिवासी, अफ्रिकी अमेरिकी व एसियाली अमेरिकी तय्ता शासन याडः च्वंपुं गोरा (भुङ्चा) पिसं अपलं पाकः व्यवहार याता । छुं दाँ हाँ भुङ्चापुं प्रहरी पिसं अफ्रिकी अमेरिकी जर्ज फ्लोयडता पुलिध्वता न्वकः घाँटी तियो स्यागु लिपाया दसु खः धायोदिल । नपांचीनय् ९० प्रतिशत हान जातित दः । आना अथे मे मेगु जातिता पाकः व्यवहार याड मखु । शिक्षाया फुक्क विषयया थःथःगु महत्व दः, छगू निश्चित विषयया फुक्क ज्ञान कायो विशेषज्ञता काय मः । जनप्रतिनिधिपुं समाजया उदाहरणत खः । अलय नेपःया शासक राजनीतिक दल तय्सं द्यो खुँत, भ्रष्टाचारी, हत्यारा तय्ता सांसद याता । अजगु द्वपंया छम्हा सांसद निलम्बन नं जुल । मेम्हा छम्हा नकतिनि ज्वन, गुलिं विसेवाडः

च्वना तिति ।

स्वार्थ मिलय मजुपिन्ता तक मन्त्री याता । नागरिकता व राहदानीया विवाद दःम्हासिता गृहमन्त्री, ठेकेदारता सहरी विकास मन्त्री, शिक्षा ब्यापारीता शिक्षा मन्त्री, बैदेशिक रोजगार कम्पनी नपां स्वापु दःम्हा सिता श्रममन्त्री दय्कगु प्रधानमन्त्रीया दोष खः । शासक दल हे खराब जूसेलिं सिंहदरवार भ्रष्टाचारया थाय् जुल । अलय् देया अर्थतन्त्र भन भन कमजोर जु जुं वाना । वयकलं धायोदिल ।

वयकलं ख्वप नगरपालिका २०५६ सालय् ख्वप मा. वि. स्वीकृति कायता तस्कं थाकुल । अलय २०५८ सालय्, त्रि.बिं ख्वप इञ्जिनियरिङ् कलेज चाय्केता अनुमति मब्यू । डा. गोबिन्द प्रसाद शर्मा उप कुलपति जुसेलिं २०६५ सालय जक ख्वप नगरपालिकाता त्रिभुवन विश्वविद्यालयया इञ्जिनियरिङ् चाय्केगु अनुमति बिला । १०-१२ दा दत ख्वप विश्व विद्यालयया विधेयक पारित मजु । शिक्षा विरोधी मन्त्री व उपकुलपति पिनिपाखं जनतां आशायाय्गु थाय् मरु ।

माघ १४ गते नेपः या प्रशासनिक वेबसाइट ह्याक याता । वनलिं अमेरिकां नेपः या वेभ साइट बांला मजुगुलिं (भरपर्दो मजुगुलिं) प्रणाली सुधार याय्ता ग्वाहाली याय् धाल । विज्ञापिसं थुकिता नेपःया प्रशासनिक वेबसाइट अमेरिकी (नियन्त्रण) लाहातय तैगु जक धाला । नेपालय् ख्वप थजगु यक्व इञ्जिनियरिङ् कलेजत दः । सरकारं थजगु कलेजता आर्थिक ग्वाहाली याडः थःगु हे सफ्टवेयर दय्केगु ज्या छाय् मयाता ? थव नेपः मिपिनिगु न्ह्यसः खः वयकलं धायोदिल ।

सांसद सुवालं धायोदिल- सांसद व मन्त्रीत थःथःगु निर्वाचन लागाय् जनतात नपां हे च्वनयमःगु कानून दय्के मः । अः अपलं सांसद व मन्त्री पिसं स्वनिगलय् छँ दाड, च्वना । थुकिं देया माथां वांकः विकास जुड्मखु । सरकारं स्वनिगता मःगु दाल,जाकी व



सच्चिद्व स्तंगुगु स्वप पौ, बःछि पौ(पाक्षिक)

तरकारी मध्ये बच्छी स्वयो अपः भारतं हङ्गु । नेपालं कोशी, गण्डक, महाकाली, माथिल्लो कर्णाली, अरुण तेस्रो, तल्लो अरुण, पश्चिमसेती लिता न्ही दक सः तय्वं हे भारतं दाल, जाकी व तरकारी छवयो है मखु । अलय् नाकाबन्दी याई । अजगु इलय् थानाया थ्व सिमन्टी छँ छुं नं नकय् फै मखु स्वनिगया जनता नय मखाडः सी । उकीं देशय् थाय्थासय् चिच्या-चिच्या हांगु सहर व चाकलीं बँ, (कृषि भूमि) दय्क तयमः । नेपः दे थजगु आर्थिक विकास मजनीगु देशय् तः तः हांगु सहर दय्कः फोहर थासय् लाकय् थाकुई । उकीं नेपःमि पिन्ता शिक्षा रोजगारी उपचारया निंतिं स्वनिगलय् वय मालिगु अवस्था मदय्क छ्वयमः ।

वयकलं धायोदिल-विश्व व्यापीकरण धायगु निजीकरण हिं त्यनिपुंशासक दलपिसं याडः शिक्षा व स्वास्थ्य नपां निजीकरण जुगु खः । संसारया विज्ञान व प्रविधिया विकास फुक्क देशय अःपुक थयंकय्गु हे विश्वव्यापीकरण खः । विश्वव्यापीकरण धायगु निजीकरण मखु । विश्व विद्यालयया पाठय्क्रम हे हिङ्के मः ।

वयकलं कर्णाली प्रदेशय् जङ्गलय हे बसोबास याड च्वंपुं राउते नपां मेमेगु लिपा लापुं जाति पिन्ता शिक्षा व स्वास्थ्य सेवा मब्यूपुं सरकार देश व जनताया सरकार मखु । गोरखा व धाडिङ्गया अपलं बस्ती व कृषिं सय्किगु बँ मदय्कः हङ्गयागु बुढी गण्डकी जलविद्युत योजनाता स्थानीय जनतां समर्थन यागु मरु । फेवाताल

नगर प्रमुख प्रजापति जुं न्हँम्हा प्रजिअता लसकुस

माघ २२ गते

ख्वप नगरपालिकाया प्रमुख सुनिल प्रजापति जुं सुर्खेत जिल्लां ख्वपय् सरुवा जुयो भः म्हा प्रमुख जिल्ला अधिकारी खगेन्द्र प्रसाद रिजाल जु याता स्वम्हु बियो, तक्वा तपुलीं पुइकः, खादा क्वखाय्क लसकुस याड दिल । उगु म्हासिङ्का पिब्वयगु ज्या इवः सं प्रमुख प्रजापति जुं ख्वपया शान्ति सुरक्षा, जात्रा व्यवस्थापन, सांस्कृतिक सम्पदा सुरक्षा थजगु विषयसं जिल्ला प्रशासन कार्यालय व नगरपालिका मिलय जुयो ज्या सानय्गु विश्वास प्वंकसे स्वंगु तहया सरकारया सिद्धान्त कः घाड, सहकार्य याडः हज्याय्गु खौं कुलदिसे वयकलं ख्वपया दूधपाटीया भाज्यापुखु लिक्क्या लौं चाय्केगु खाय् गृहमन्त्रालय अन्तर्गतया जुद्ध बारुण यन्त्र चाकलीया लौं चाय्केता मंकः कुतलं ज्या याङ्गु विश्वास प्वंकः दिल ।

उपप्रमुख रजनी जोशी जुं ऐतिहासिक महत्व कः घाडः च्वंगु ख्वप देया सांस्कृतिक ज्या इवःसं जिप्रकां ग्वाहाली याङ्गु बिश्वास प्वंकः दिल ।

अर्थे प्र.जि.अ. रिजाल जुं ख्वप नगरपालिका पाखं मेमेगु स्थानीय तहलं सय्क काय् मःगु अपलं ज्या दःगु खौं ब्याकसे

स्वयो यक्व यक्व तः हांकः अपः ना मुंकय्गु पुखु दय्केगु स्वयो चिच्या चिच्या हांगु पुखु दय्कः उर्वरभूमित मस्यंकः जलविद्युत योजना दय्केगु नेपः देता भिं जुई । थुगु विषय जिमिसं सः थ्वयकःच्वडा । भीगु कलेजं पास जू पुं ब्वनामिपिसं सचेत जूयो देश व जनताया सेवा याय्मः ।

ज्या इवःसं सभापति नपां ख्वप नगरपालिकाया प्रमुख सुनिल प्रजापति जुं दे हङ्गयाय्ता प्राविधिकतय्गु तः हांगु लाहा दैगु खौं ब्याकसे छुं भाति फाइदाया लागिं ठेकेदार नपां मिलय जुयो मज्यगु ज्या मयाय्ता अनुरोधयासे केन्द्र सरकारया असहयोगं विश्वविद्यालय हे न्यायमियगु बस्तु थें याङ्गु उदारवादी नीति थुकिया मू हुनि खः धायो दिल ।

अथेहे वागमती प्रदेश सभाया सांसद सृजना सैजुं शिक्षा लागाय् ख्वप नगरपालिकां आन्दोलन काथं हज्याकः ज्यासाडः नैपुं ज्यापु ज्यामिया सन्तानपिन्ता उच्चशिक्षा ब्वंकः प्राविधिज्ञ दय्कगु खौं कुलदिसे राज्य, राजनीति व शिक्षां युवापिन्ता थःगु देशय् ज्या सानय्गु वातावरण दय्क बियमः धायो दिल ।

ख्वप इञ्जिनियरिङ्ग कलेजया प्राचार्य ई. सुजन माक ख्वप कलेज अफ इञ्जिनियरिङ्गया प्राचार्य सुनिल दुवाल, अथेहे उप प्राचार्यपुं रबिन्द्र फोजु, रत्न शोभा प्रजापति जु पिसं नं भिन्तुना न्वचु तयो द्यगु खःसा मू पाहाँ पाखं २०७८ सालया स्नातक व स्नातकोत्तर सि धःपुं ब्वनामिपिन्ता मतिनाया चिं लः ल्हाडः द्यगु खः ।



अन्तर्राष्ट्रिय जगतय् नेपः देया म्हासिङ्का पिब्वयत्ता तःहांगु ज्या याडः च्वंगु ख्वप देता शान्ति सुरक्षा बियता जनप्रतिनिधि व स्थानीय जनता नपां लाहापा स्वाड हज्याय्गु बचं बियोदिल ।

उगु ज्या इवःसं वडा नं. ९ या वडाध्यक्ष रबिन्द्र ज्याख्व नपां प्रमुख प्रशासकीय अधिकृत कृष्ण गिरीं नं न्वयु तयो द्यगु खःसा प्रमुख प्रजापति जु मतिनाया चिं काथं ख्वपया लोकं हवागु म्हवयखा इयो व नगरपालिकाया पिथनात उपहार काथं बियो दिल ।

हिंस्वकगु नगरपरिषद् उद्घाटन

माघ २३ गते

'निर्वाचन समाजवाद वै धायगु विचः संशोधनवाद' - का. रोहित



नेपाल मजदुर किसान पार्टीया नायो भाजु नारायणमान बिजुक्छें जुं ख्वप नगरपालिकाया हिंस्वकगु नगरपरिषद् पानसय् मता च्याक, उलेज्या याडः दिल ।

ज्या इवःसं वयकलं नगरसभा सुथंलायमः धायोदिसे सर्वहारा

वर्ग हचिलः, न्ह्यलुवा जुयो ज्या मसांतलय समाजवाद वैमखु, उकिता वर्गसंघर्ष मयासें मगा धायो दिसे निर्वाचनं समाजवाद वै धायगु संशोधनवाद खः श्व कम्युनिष्ट पार्टी दुनयया पूंजीवादी विचः खः धायोदिल ।

क्रान्तिया वातावरण तयार जुय धुकं नं क्रान्ति मयाइपुं दक्षिणपन्थी अवसरवाद व क्रान्तिया वातावरण तयार मजुइकं हे क्रान्तियाइपुं वामपन्थी अवसरवाद त्वःतः राजनैतिक संघर्ष हचिइकेता वयकलं बः याडः दिल ।

नेपालय् पश्चिमेली संसदीय राजनैतिक प्रणाली सं प्रतिपक्षया व्यवस्था दैगु, खाँ कुल दिसे वयकलं नेपाली कांग्रेस सरकारता समर्थन याडः संसदीय मूल्य व मान्यता हाचां गायो वांगु बिचः प्वंक दिल ।

जनताता राजनैतिक रुपं ग्वाकः सशस्त्र क्रान्ति खं जक समाजवादी व्यवस्था पलिस्था याय्ता राजनैतिक संघर्ष हछ्याड च्वंगु नेमकिपाता संकीर्ण व जडसूत्रवादी दक द्रुपं विइपुं राजनैतिक दल व दलया नेतात संशोधनवादी व अवसरवादी खः नायो भाजु बिजुक्छें जुं धायो दिल ।



सच्छिव स्तंगु स्वप पौ, बःछि पौ(पाक्षिक)

राजनीतिक दलस्वच्छता मरुगुलिं हे भन भन लिनय लः वांगु खाँ काडः दिसे वयकलं धेवा व पदया लागिं राजनीति याइपिसं देश व जनताया निः स्वार्थ सेवा याय् मफैगु खाँ ब्याकः दिल ।

खःगुता खः मखुगुता मखु धाय् फःसा देशय् ट्रँ काइबलय् ट्रँ लुयो वैगु गुकिं देया समस्या ज्यंका हज्याय् फैगुलिं व स्वच्छ राजनीति जुइगु खाँ ब्याकसे वयकलं सच्चा कम्युनिष्ट पार्टी भूमिसुधार व्यक्तित्व विकासय् उथिंयकः मौका, योग्यताकाथं ज्या व ज्या स्वयो ज्याला, शिक्षा व स्वास्थ्य निः शुल्क याय्मः धायो दिसे थःता क्रान्तिकारी व समाजवादी दल धाइपिसं पुँजीपति वर्याया न्ह्यलुवाय् सरकारेवानिगु नीति नेखेरं क्वाचा(द्वैध चरित्र) खः धायो दिसे वयकलं सिद्धान्तता बेक्वय्क मखुकाथं छ्यः गुलिं देशय् राजनीतिक लौपु ताडः अन्योल जूगु खाँ काडः दिल ।

ज्या इवः या सभाया नायो नपां ख्वप नगरपालिकाया प्रमुख सुनिल प्रजापति जुँ नगरसभा नगरपालिकाया व्यवस्थापिका जुगुलिं थुगु सभां संविधान व कानून व्युगु अधिकारया लिधंसाय नगरपालिकाया लागिं मःगु ऐन, कानून, नीति-नियम, निर्देशिका, व कार्यविधित दय्कः वयागु खाँ ब्याक दिल ।

स्वायत्तताया नामय् स्थानीय तहता संघ व प्रदेश क्वत्यल तैगु अःया मू समस्या खः धायोदिसे वयकलं संघ व प्रदेश सरकारं स्थानीय तहता थःगु मातहतया निकायकाथं व्यवहार याडः च्वंगु स्वायत्तता संविधानया भावनाया अखः खः धायोदिल ।

ख्वप नगरपालिका शिक्षा, स्वास्थ्य, सम्पदा ल्यंकः म्वाकः तय्गु, कृषि विकास निर्माण, सुचुकुचु थजगु लागाय् याडः च्वंगु ज्याया प्रतिबेदन पिब्वयो दिसे प्रमुख प्रजापति जुँ नेमकिपाया नायो भाजु नारायमान बिजुकुछँ जुया म्हागसथँ सच्छिदा लिपाया ख्वप दे काथंया लौपु, ज्वडः लिपा थ्यंकया उदेश्य ज्वडः हज्याडः च्वंगु दः धायोदिल ।

ख्वप नगरपालिकाया उप प्रमुख रजनी जोशीं ख्वप नगरपालिकां नेमकिपाया घोषणा पत्रया लिधंसाय देश व जनताया निःस्वार्थ सेवा याडः वयागु खाँ ब्याकसे जनप्रतिनिधि व कर्मचारी पिनिगु कुतलं नगरपालिकां थौया अवस्थायतक तःलाक हज्याडः वयफःगु खः धायोदिल ।

ख्वप जिल्लाया प्रमुख जिल्ला अधिकारी खगेन्द्र प्रसाद रिजालं नगरसभा तः लाय्मः धायोदिसे अनुशासन, सुशासन, कला संस्कृति ल्यंकः म्वाकः तय्गु, शिक्षा, स्वास्थ्य थजगु लागाय् ख्वप नगरपालिका ब्वस्यलागु खाँ काडः दिल ।

संविधानं खांगु म्हागसकाथं संघीयताया अभ्यास याय्गु इवल्य ख्वप देशय् सुशासन, शान्ति सुरक्षा याय्ता फुक्क स्वापु दःपुं नपां लाहापा स्वाडः हज्याय्गु खाँ ब्याकसे वयकलं नगरसभां मः

काथंया ऐन कानून दय्केगु विश्वास प्वकः दिल ।

भक्तपुर क्यान्सर अस्पतालया कार्यकारी निर्देशक विष्णुदत्त पौडेल जुं भक्तपुर क्यान्सर अस्पतालता सरकारी अस्पताल दय्केता ख्वप नगरपालिकाया तःहांगु लाहा दः गु खाँ कुल दिसे थुगु अस्पतालय् क्यान्सर ल्वयया फुक्क उपचारया व्यवस्था दः धायोदिल ।

मेडिकल अन्कोलोजिया अध्ययन अध्यापन नं भक्तपुर क्यान्सर अस्पतालं याडः च्वंगु खाँ ब्याकसे वयकलं भक्तपुर क्यान्सर अस्पतालं क्यान्सर ल्वगिपिन्ता प्यालियटिभ केयरया सुविधा नं वियो च्वडागु खाँ ब्याकः दिल ।

ख्वप इञ्जिनियरिड कलेजया प्राचार्य ई. सुजन माकं ख्वप देता ज्ञान विज्ञानया मू थाय् दय्केगु तातुना ज्वडः ख्वप इञ्जिनियरिड कलेज व ख्वप कलेज अफ इञ्जिनियरिडं सर्वसाधारण जनताता म्हावचा शुल्क कायो बांलाकः भिंकः शिक्षा बियो वयो च्वंगु खाँ ब्याक दिल ।

कलेजय् ब्वंपुं ब्वनामपिनिगु ल्या पिब्वसे छात्रा तय्गु तथ्याड्क च्वछाय् बहजुगु खाँ नपां देशादेछिया ब्वनामिपिन्ता शिक्षा बियो वयो च्वंगु खाँ ब्याकः दिल ।

नगरसभाया उलेज्या सं वडा नं. ९ या वडाध्यक्ष रविन्द्र ज्याख्वः, व ख्वप नगरपालिकाया प्रमुख प्रशासकीय अधिकृत कृष्ण गिरी नं न्वचु तयो द्युगु खः ।

हिस्वकगु नगर सभा न्ह्यातः



ख्वप नगरपालिकाया प्रमुख नपां हिं स्वकगु नगरसभाया नायो भाजु सुनिल प्रजापतिया नायो सुई ख्वप नगरपालिकाया हिंस्वकगु नगरसभाया न्हापांगु बैठक माघ २३ गते चवन ।

बैठक न्ह्याकसे सभाध्यक्ष प्रजापतिजुं धन्यवाद प्रस्ताव पारित यासे संविधानय् कानूनं व्युगु अधिकार फक्कः अपः छ्यलिगु नगरपालिका काथंया ख्वप नगरपालिका खः धायो दिल ।

मेगु नगरसभाया बैठक २०७९ माघ २५ गते १ बजे चवनय्गु याडः क्वचाय्कल ।

सरकारं थ यत्थें याय् मफय्केता बल्लागु प्रतिपक्ष मः

माघ २५ गते

खप नगरपालिकाया प्रमुख नपां हिंस्वकगु नगर सभाया नायो भाजु सुनिल प्रजापतिया नायो सुई च्वंगु बैठकसं नगरसभाता प्राज्ञिक छलफल याय्गु थाय् काथं हचिद्वकः च्वडागु नपां थ्व च्वयया निकाय खः धायो दिल । सरकारं थः यत्थें याय् मदैगु काथं पानय्ता बल्लागु प्रतिपक्ष मः धायो दिसे वयकलं प्रधानमन्त्रीता विश्वासया मत विड्गु राजनीतिक दल प्रमुख प्रतिपक्ष दल जुय फैं मखु धायो दिसे वयकलं ऐन काथं नेपाल मजदुर किसान पार्टीता प्रमुख प्रतिपक्षया जिम्मेवारी वियमः धायो दिल ।

नागरिकताया लिधंसाय सत्तालाहातय् लाकय्ता नागरिकता विधेयक हःगु खाँ ब्याकसे विशेष समयसं सभासदपुं श्याम सुन्दर मातां, सुर्यप्रसाद श्रेष्ठ, राम सुन्दर बासी, इन्द्र बहादुर प्याथ, कल्पना शिल्पकार, मञ्जु लाखा, तारादेवी शाक्य, कृष्ण गोपाल चौगुठी, कृष्ण नारायण दुमरु, राजकुमार शिल्पकार, पुरुषोत्तम तमखु, नारायण प्रसाद त्वानाबासु, जितेन्द्र मुनं कःमि व गोविन्द दुवाल जु पिसं २०७९ माघ २८ व २९ गते वाराय जुड्गु ने.क्रा.किसान संघया स्वकगु राष्ट्रिय सम्मेलनया भिं म्हुयो दिसे तराई वास्तविक किसानया मोहियानी हक मदैगु अवस्था दयो च्वंगु, देसी सः मरुगु नागरिकता विधेयक खारेज याय् मःगु मू मू नाकाय् सी सी क्यामरा तय्ता ध्यानाकर्षण याडः दिल ।

सभासं नगरया विकास निर्माण कृषि, सहकारी विषय



न्यंगु न्ह्यसःया लिसः बियो दिसे सहकारी समितिया कजि हरिप्रसाद वासुकला, कृषिसमितिया कजि राजकृष्ण गोरा, निर्माण समितिया कजि उकेश कवां जुं प्रष्ट याडः दिल ।

नगर प्रमुख प्रजापतिया अनुमति खय् विधान समितिया कजि हरिराम सुवाल जुं खप नगरपालिका (नगर कार्यपालिका व समिति) या बैठक सञ्चालक सम्बन्धी कार्यविधि २०७९ छलफलया लागिं सभासं प्रस्तुत याडः दिल ।

नगर सभा मेगु बैठक माघ २६ गते न्हिनय् सिया १:०० ता इलय् च्वनय्गु याडः क्वचाय्कल ।

खप नगरपालिकाया बैठक सञ्चालन सम्बन्धी कार्यविधि २०७९ पारित

माघ २६



खप नगरपालिकाया प्रमुख नपां हिंस्वकगु नगर सभाया नायो भाजु सुनिल प्रजापतिया नायोसुई च्वंगु बैठकं खप नगरपालिका

(नगर कार्यपालिका व समिति) या बैठक सञ्चालन सम्बन्धी कार्यविधि २०७९ सर्वसम्मति पारित यात ।

उगु कार्यविधिसं जूगु छलफलय् सभासदपुं नारायण प्रसाद त्वानाबासु व हरिरत्न गोर्खाली न्यंगु न्ह्यसःया लिसः वडाध्यक्ष रविन्द्र ज्याख्वजुं बियो दिल ।

उगु बैठकया विशेष समयसं सभासद् रामसुन्दर बासी, मञ्जु लाखा, सुमित्रा बोहजु, कल्पना शिल्पकार, विष्णु केशरी दुवाल, रीता फसिकवा, तारादेवी शाक्य, बिष्णु माया कामी, सुर्यप्रसाद श्रेष्ठ, सिद्धि रत्न अवाल, हरिरत्न गोर्खाली, न्हुच्छेराम कोजु, हेरा ख्याजु, कृष्ण सुन्दर प्रजापति व जितेन्द्र मुनं:मि जु पिसं नगरया सुचुकुचु, त्वनय्गु नाः, विकास निर्माण, कृषि विषय खाँ तयो दिलसा उकिया लिसः शिक्षा, संस्कृति स्वास्थ्य समितिया दुजः रविन्द्र ज्याख्व जुं आधारभूत ढ्वनय्कुथित च्वजाय्कः यंकयता

सच्छिव स्तंगूगु खवप पौ, बःछि पौ(पाक्षिक)



पार्किङ व्यवस्थापन व त्वनयगु नाः या विषय वडाध्यक्ष श्याम कृष्ण खत्री (१) जुं नेगू पार्किङ स्थल दय्के धुंगु, नगरब्याक मेलम्चीया नाः हय्ता खाँ जुयो च्वंगु स्पष्ट याडः दिल ।

निर्माण समितिया कजि उकेश कवां नं गाकः पुँजी छ्वयो महःगुलिं विकास निर्माण लिपालागु व अरनिको सभा भवन नं दय्के मफयो च्वंगु खाँ काड दिल ।

सभासं नगर प्रमुख प्रजापति जु या अनुमतिखय् विधायन समितिया दुजः कृष्ण प्रसाद कोजुं खवप नगरपालिकां युवा उद्यमशीलता प्रबर्द्धन ऋण परिचालनया सम्बन्धय् दयकगु निर्देशिका २०७९

छलफलया लागि प्रस्तुत याडः दिल ।

नगर सभाया मेगु बैठक फागुन १ गते न्हिनय् सिया १:०० ताइलय् च्वनयगु याडः सिधःगु जानकारी बियो दिल ।

खवप नगरपालिकां निरीक्षण, आर्थिक अनुदान नपां तालिम बियोवगु, ६ वडाया शिशुस्याहार मेथाय् यंकय्ता थाय् माल च्वंगु, शववाहन न्याय्ता कानूनी भञ्जकट जुयो च्वंगु खाँ काडः दिल ।

भक्तपुर क्यान्सर अस्पताल ज्या साडः नैपुंवर्गया सेवा खय् जुयम

माघ २१ गते

भक्तपुर क्यान्सर अस्पतालया ग्वसालय् विश्व क्यान्सर दिवसया २०२३ या लसताय जूगु ज्या इवःया उलेज्या खवप नगरपालिका प्रमुख सुनिल प्रजापति जुं याडः दिल ।

ज्या इवःसं प्रमुख प्रजापतिजुं क्यान्सर लवयया उपचार तस्कं खर्च वानिगु नपां धन जनया क्षति जूयो चिकं नं फू मता नं सी धःथें जुइगुलिं इलय हे लवय लुइके फःसा बांलाइगु खाँ ब्याकसे भक्तपुर क्यान्सर अस्पतालं ज्या साडः नैपुं वर्गया सेवायाय् मः धायो दिल ।

नेपः या सरकारं कडा लवय जूपुं विरामीपिनिगु धेबा म्वाय्कः उपचार याय्मः धायो दिसे वयकलं सामुदायिक अस्पतालया सेवा बांलासा गरिब जनताता उपचार याय्ता अःपुइगु खाँ काडः दिल । म्हेगः गैर सरकारी संस्थाया लाहातय् लाकगु थुगु अस्पताल अः सरकारी अस्पताल काथं चाय्क सेलिं अपुकः सेवा याडः वगु नपां भक्तपुर अस्पताल नं अः बागमती प्रदेशया नमूना अस्पताल जूगु भक्तपुर क्यान्सर जनताया अस्पताल जूगुलि गौरव याय् लाइक जू धायो दिल ।

अथेहे भक्तपुर क्यान्सर अस्पतालया प्रा.डा. बिष्णुदत्त पौडेल जुं क्यान्सरया निंति दःगु उपचार का कां थुगु अस्पताल उपचार केन्द्र काथं ह्छ्याय्ता थानाया फुक्क पुचलं कुतः याडः च्वंगु दः



धायो दिल ।

उगु ज्या इवः सं भक्तपुर अस्पतालया मे.सु. सुमित्रा गौतम, भक्तपुर क्यान्सर अस्पताल विकास समितिया दुजः गणेश दंगाल, जिल्ला जनस्वास्थ्य कार्यालयया स्वास्थ्य अधिकृत कृष्ण बहादुर मिजार, बिसिएचया कन्सल्टेण्ट डा. रोशन प्रजापति व नर्स मनिसा साखकर्मि पिसं नं न्वचु तयो द्यगु खः ।

ज्या इवः सं प्रमुख प्रजापति जुं थी थी तः लापुं किपाकःमि पिन्ता सिरपा व दसि पौ लःल्हाड दिल । उगु ज्या इवः सं जन चेतनामुलक प्याखं व बाखं म्यें क्यंगु खः ।

खुम्बु पासाङ ल्हामु गा.पा.या अध्यक्ष शेर्पा ख्वप नगरपालिकाय्
(२०७९ माघ १३ गते)



का.वा प्रमुख रजनी जोशी सम्पदा, विकास निर्माणया ज्या इव: निरीक्षणय्
(२०७९ माघ १७ गते)



ख्वप इन्जिनियरिङ कलेजया पलिस्था दिंया उलेज्या
(२०७९ माघ २० गते)



ख्वप इन्जिनियरिङ कलेजया पलिस्था दिंया ज्या इव: क्वचाल
(२०७९ माघ २१ गते)

